

Ataatsimiinneq Maniitsumi ingerlanneqassaaq aallartissallunilu nal. 08.30

Peqataasut:

***Atassut***

Siverth K. Heilmann  
Anna Karen Hoffmann  
Kristian Kreutzmann, *Emilie Olsen-imut sinniisussatut*

***Inuit Ataqtiguit***

Juliane Enoksen, *telefon-ikkut peqataassaaq*  
Sofie Dorthe R. Olsen  
Erneeraq Poulsen

***Partii Naleraq***

Malene Ingemann

***Siumut***

Malik Berthelsen  
Evelyn Frederiksen  
Ruth Heilmann,  
Efraim Olsen, *Gideon Lyberth-imut sinniisussatut*  
Karl Lyberth  
Frederik Olsen,  
Hans Frederik Olsen  
Jakob Olsen

***Nalunaaqqaarlutik peqataannngitsut***

Gideon Lyberth  
Emilie Olsen

**Ammasumik ataatsimiinnermi oqaluuserisassat:**

**Imm. 01 Oqaluuserisassat akuersissutigineri**

**Imm. 02 Borgmesterip nalunaarutaa**

**Imm. 03 Ataatsimiititaliani siulittaasut nalunaarutaat**

**Aningaasaqarnermut tunngasut**

**Imm. 04 Pitsaaliuisutut atorfiup piffissap ilaannaanit atorfiunerata, piffissaq tamakkerlugu atorfinngortinneqarnissaanik siunnersuut**

**Imm. 05 Maniitsumi arsaattarfik ivigaaraasalik**

**Suliassat nalinginnaasut**

**Imm. 06 Qeqqata Kommuniani Meeqqat illersuisuata angalaneranut nalunaarusiaq, 2017**

**Imm. 07 Arnangarnup Qooruani eqalunniarnissamut immikkut akuersissuteqalersinnaanissaq, tammajuitsussarsisitsiniarlunilu piniariartitsisinnaalersitsinissaq**

**Imm. 08 Qeqqata Kommunianut Kukkunersiuisut nalunaarutaat nr. 26**

**Imm. 09 Sisimiuni Akiani najugaqarfissiassamut kiisalu meeraaqqeriviliorfissamut/meeqqerivissamut kommunip pilersaarusiordfigineqarneranut tapiliussaqaq nr. 25-ssatut siunnersuut**

**Imm. 10 Kangerlussuup kangiani unnuisarfeqarfissamut / illuaraqarfissamut kommunip pilersaarusiordfigineqarnerani tapiliussaqaq nr. 29-ssatut siunnersuut**

**Imm. 11 "Maniitsumi Tikaasami Heliportitoqqami siunertanut ataatsimoorussanut inissiassanik nutaanik atortulersuutinillu sanaartornissaq" pillugu kommunip pilersaarusiordfigineqarnerani tapiliussaqaq nr. 34-p akuersissutigineqarnera**

**Imm. 12 Ataatsimoorussamik siunertanut immikkoortoq, atuakkanik atorniartarfimmuq, nipilersornermullu ilinniarfimmuq Kommunip pilersaarusiordfigineqarneranut tapiliussaqaq nr. 49**

**Imm. 13 Aningaasaqarnermut ataatsimiititaliap kommunalbestyrelsillu 2018-imi ataatsimiiffissaannut siunnersuutit**

**Imm. 14 2017-mi pitsaassuseq pillugu atuarfiit nalunaarusiaat**

**Imm. 15 Oqaluuserisassatut siunnersuut - Aningaasanik aqutsisinnaanermik pikkorissarneq**

**Paasissutissiissutit**

- Imm. 16**      **Nilammik imermillu avammut nioqquteqarnermi periusissiaq pillugu tusarniaaneq**
- Imm. 17**      **Tamalaat**

**Imm. 01 Oqaluuserisassat akuersissutigineri**

**Aalajangiineq**

**Imm. 02 Borgmesterip nalunaarutaa**

**Aalajangiineq**

**Imm. 03 Ataatsimiititaliani siulittaasut nalunaarutaat**

**Aalajangiineq**

**Imm. 04 Pitsaaliuisutut atorfiup piffissap ilaannaanit atorfiunerata, piffissaq tamakkerlugu atorfinngortinneqarnissaanik siunnersuut**

*Journalnr. 48.02.20*

Tunuliaqutaq

Kommunalbestyrelsimi ilaasortaqa Sofie Dorthe Olsen 2017-imi aggustip 30-ani maileruteqarluni siunnersuutigaa, Atammimmi pitsaaliuisutut atorfik piffissaq tamakkerlugu atorfinngortinneqassasoq.

Ullumikkut Atammimmi pitsaaliuvisuq ullormut akunnerni sisamani sulisarpoq, nunaqarfinnilu tamani qeqqata kommuniata ataaniittut tamarmik taamaallutik.

Atammik immikkut isigineqartariaqarnera uani erseqqissarniarpara, ilisimariikkatsitut massakkorpiqaq Atammimmi kinguaassiutitigut innarlerneqarsimasut pillugit suliniutit aallartisarneqaqqereerput, tamannalu inuttaasunit tigulluarneqarsimasoq tusarparput.

Sullinneqartulli amerlanerpaartaat inersimasuupput, inunnillu isumaginninnermi sullissisutut ilisimavara, meeqqanik kinguaassiutimikkut innarlerneqarsimasunik pasitsaassinerit pillugit sulianik ingerlatsiniarsarisortoq. Ajoraluartumilli Atammimmi inunnik isumaginninnermut sullissisoq ataasiinnaavoq, taannaavorlu inersimasunik annermik sullissisuusoq. Pitsaaliuvisup suliasai arlaqaraluarput soorlu: Ullumikkut angajoqqaat inuusuttullu ikiaroorartumik atuisut Atammimmi ikisassaangitsut innuttaasut eqqartortarpaat, meeqqat ferie nalaani nunaqarfimmii-ginnartut ikisassaaneq ajorput, inuusuttuaqqanut sammisassaritinneqartut annikippallaarput. Saniatigullu Napasumi annertuumik meeqqat ilaqutariillu sammineqarsinnaasut qaammarsaavigineqarsinnaasut ikigisassaanatik. Pitsaaliuvisuq ulloq tamaat sulisaleraluarpat inunnik isumaginnittoqarfiup sulisui taarseraqisut Atammimmut tikittarneri ikilisinnaapput pitsaaliuvisup suliai annertusippata, meeqqat kinguaassiutimikkut innarlerneqarsimasutut pasitsaaffigineqartut angajoqqaavi peqatigalugit sullissinerit, pinaveersaartitsinerit ingerlanneqarsinnaapput.

Ullumikkut pitsaaliuisutut atorfik ullup affaannaa atorfiuvoq (ullormut akunnerit sisamat), atorfeqartullu inuuniarnerminut ullumikkut amigarilersimavaa, taamaattumillu allamik suliffissamik eqqarsaateqalersimalluni. Nunaqarfinni pitsaaliuvisumik atorfinitsitiniarneq ajornartorsiutaasoq nalunngilarput, tassa ullup affaannaanut sulisussaanertik amigarisarmassuk.

Taamaattumik Atammimmi pitsaaliuvisuq atorfimminik tunuassappat piffissami sivilisuumi atorfiup inuttassaqaanginnera qularutissaanngilaq. Tamaattumik isumaqarpunga, pitsaaliuisup atorfia tamakkiisumik atorfinngortillugu (ullormut akunnerit 8) allanngortinneqarnissaa tapersorsornartuusoq, tassunga tunngavissaqarluarmat.

Pissutsit atuuttut

Atammimmi pitsaaliuisutut atorfik ullormut akunnerni sisamani atorfiuvoq, piffissarli tamakkerlugu atorfimmi piffissap affaani qaammammusiaqarfiulluni.

Allaffeqarfiup naliliinera

Pitsaaliuineri atorfiup piffissaq tamakkerlugu atorfinngortinneqassappat, suliartoqquneratarsinnaanermut tapisiat ilanngullugit tunngaviusumik akissarsiasat trin siulliat malillugu tamanna qaammammut 25.008 koruuninik naleqassaaq, tamannalu maannakkut

missingersuusiorfigineqarnikuunani, soorluttaa piffissap ilaannaa atorfik piffissaq tamakkerlugu atorfinngortinneqassappat, atorfiit akuerisaasut aamma eqqarsaatigineqartariaqarlutik.

#### Innersuussut

Innersuussutigineqarpoq, kommunalbestyrelsip siunnersuut eqqartussagaa, malitsigisaanillu Ilaqutariinnermut Isumaginninnermullu Ataatsimiititaliamut ingerlateqqillugu.

#### Kommunalbestyrelsip suliamik sularinninnera

Kommunalbestyrelsi 2017-imi septembarip 28-ani ataatsimiinnermini innersuussut akuersissutigaa.

#### Suleriaqqinnissaq

Atammimmi pitsaaliuisutut atorfiup affaannaasup tamakkiisumik atorfinngortinnissaa allaffeqarfiup misissornikuuvaa, ilutigalugulu nunaqarfinni allani pitsaaliuisutut atorfiit qaffanneqarnissaanut pisariaqartitsisoqarnersoq misissuiffigalugu.

Nunaqarfinni allaffinni sulisut amerlassusiligaanerisa misissorneqarnerini takuneqarsinnaavoq, Napasumi marlunnik affarmillu sulisut amerlassusiligaasut, tamatumani 2015-imi 2016-imilu inunnik isumaginninnermut siunnersortimik atorfeqartoqarsimanera tunngaviulluni. Pineqartorli suliunnaarmat, atorfik inuttassarsiuuteqqinneqarnikuunngilaq.

Amerlassusiliineq ataaseq taanna amerlassutsinut marlunnut avinneqarnissaa qinnuteqaatigineqarpoq, aappaa Atammimmi aapaalu Itillimi. Nunaqarfinni taakkunani pitsaaliuineramik suliniuteqartoqarnissaanik pisariaqartitsisoqarnerpaaneramik tunngaveqarpoq. Sarfanguani pitsaaliuinnermut atorfik affaannaasooq tamakkiisunngortinneqareerpoq, affaa atuiffik 18 atorlugu akilerneqartarluni.

Kangerlussuarmi ullup affaani pitsaaliuisutut atorfik, ullullu affaani siunnersortimut ikiortitut atorfik, atorfimmuut ataatsimut ataatsimoortinneqarnikuupput. Kangaamiuni siunnersortimut ikiortitut atorfik tamakkiisumik atorfiuvoq, pitsaaliuisutullu atorfik ullup affaa atorfiulluni, taamattorli pitsaaliuisutut ullup affaa atorfik inuttaleruminaatsittarpaat. Taamaakkaluartoq nunaqarfinnut ataqatigiissaarisup ilaatigut innersuussutigaa, katersugaasivimmi atorfik suli inuttalerneqanngitsoq ullup affaa pitsaaliuinermi atorfimmuut, ullullu affaa katersugaasivimmi ikiortitut atorfinngortinneqassasoq, tassannga atorfinikkumaartussa qatersugaasivimmiutigaluni pitsaaliuinissamut tunngasunik suliaqarsinnaanngorlugu.

2018-imut missingersuutit akuersissutigineqarnerini Maniitsumi inunnik isumaginninnermut siunnersortit marlunnik ilaneqassapput, Sisimiunilu inunnik isumaginninnermut siunnersortit marlunnik ilaneqassallutik, ilutigalugu meeqqanut inuusuttunullu inatsit nutaaq tunngavigalugu ataatsimoortumik tapiissutitigut inunnik isumaginninnermut atorfinnik nutaanik sisamanik pilersitsisoqassalluni. Taamaaliornikkut nunaqarfinnut tunngatillugu isumaginninnikkut isumaginninneq siunissami pitsanngoriaateqassaaq.

Naak, suliaq Ilaqutariinnermut Isumaginninnermullu atatsimiititaliamut innersuussutaagaluartoq suliaq Aningaasaqarnermut ataatsimiititaliami sularineqassaaq, Aningaasaqarnermut ataatsimiititaliaq atuiffik 11-mut akisussaasuummat

Aningaasaqarnikkut allaffissornikkullu kingunerisinnaasai

Atuiffik 11-mi nuutsisoqarnissaa pisariaqartinneqarpoq, takuuk eqitsit 1

**Eqitsit 1**

Atuffiup normua	Atuiffiup taaguutaa	2018-imut aningaasaliissutit	Tapiissutit	2018-imut nutaamik aningaasaliissut
11-00-70-01-10	Qaammammusiat Napasq	606.000	- 240.000	366.000
11-00-50-01-10	Qaammammusiat Itilleq	416.000	+ 120.000	536.000
11-00-80-01-10	Qaammammusiat Atammk	810.000	+ 120.000	930.000
	<b>Katillugit</b>	<b>1.832.000</b>	<b>0</b>	<b>1.832.000</b>

Allaffeqarfiup naliliinera

Atammimmi Itillimilu pitsaaliuisutut atorfiit ulloq naallugu atorfinngortinneqarnissaanik siunnersuuteqartoqarnera pitsaasuvoq, taamaaliornikkullu sulisussanik ajornannginnerusumik qammaasoqarsinnaalissalluni, maanna tikillugu ullup ilaannaa atorfinitsitsinissaq ajornakusoornikummat.

Allaffeqarfiup innersuussutaa

Allaffeqarfiup aningaasaqarnermut ataatsimiititaliamit akuereqqullugu innersuussutigaa:

1. Atammimmi Itillimilu pitsaaliuisutut atorfiit ulloq nallugu atorfinngortillugit qaffanneqassasut
2. siuliani eqitsit naaperlugu nuutsisoqassasoq

Aningaasaqarnermut ataatsimiititaliap suliamik suliarinninnera

Ataatsimiititaliap novembarip 14-ani 2017 ataatsimiinnerani innersuussut akuersissutigineqarpoq.

**Innersuussut**

Aningaasaqarnermut ataatsimiititaliap kommunalbestyrelsimut innersuussutigivaa akuereqqullugu,

1. Atammimmi Itillimilu pitsaaliuisutut atorfiit ulloq nallugu atorfinngortillugit qaffanneqassasut
2. siuliani eqitsit naaperlugu nuutsisoqassasoq

**Aalajangiineq**

**Ilanngussat**

1. Sofie Dorthe Olsen 2017-imi aggustip 30-ani maileruteqarluni, Atammimmi pitsaaliuisutut atorfik piffissaq tamakkerlugu atorfinngortinneqarnissaanik siunnersuutaa

**Imm. 05 Maniitsumi arsaattarfik ivigaaraasalik**

*Journalnr. 06.02.01*

Tunuliaqutaq

Kommunalbestyrelsip 2017-imi oktobarip 26-ani ataatsimiinnermini, Maniitsumi arsaattarfiup ivigaaraasalersorneqarnissaanut immikkut aningaasaliissutissat eqqartorpai. Tamanna sioqqullugu suliaq Teknikkeqarnermut, Aatsitassarsiornermut Avatangiisinullu ataatsimiititaliamit 2017-imi oktobarip qulingani eqqartorneqarpoq.

Arsaattarfiit angissusissaannut tunngatillugu siunissami piumasaqaataasussat pillugit Kalaallit Nunaanni Arsaattartut Kattuffianit (KAK) nalunaarutigineqartut assigiinngitsut patsisaallutik, suliaq Teknikkeqarnermut, Aatsitassarsiornermut Avatangiisinullu ataatsimiititaliamut utertinneqarpoq.

Maleruagassatigut tunngavissat

GBU unammersuarnermi malittarisassat.

Arsaattarfiit angissusissaannut tunngatillugu, kommunimi malittarisassaqaqngilaq.

Pissutsit atuuttut

Teknikkeqarnermut, Aatsitassarsiornermut Avatangiisinullu ataatsimiititaliap suliamik suliarinninnissaanut atatillugu, siunissami arsaattarfiit Kalaallit Nunaanni pissartannorgniunnerni atorpeqarsinnaanissaanni angissusissaannut tunngatillugu piumasaqaataasussat pillugit, allaffeqarfik KAK-mit oqaaseqaammik noqqaavoq. Allakkami 2017-imi septembarip arfernganeersumi (ilanngussaq 1) siulittaasuugallartup Gert Fleischer-ip paasissutissiissutigaa, Kalaallit Nunaanni pissartannorgniunnissanut arsaattarfiit angissusissaattut piumasaqaatigineqartussaq 68 x 105 meteriussasoq (FIFA--p piumasaqaataatut angitigisoq). Paasissutissiissut taanna Teknikkeqarnermut, Aatsitassarsiornermut Avatangiisinullu ataatsimiititaliamut aamma Kommunalbestyrelsimut suliamik saqqummiussinermi ilanngunneqarpoq.

Malitsigisaanik KAK nutaamik siulittaasortaarpoq, kommunalbestyrelsillu suliamik suliarinninnissaa sioqqullugu, kommunalbestyrelsimut ilaasortap Hans Frederik Olsen-ip, siulittaasunngortoq John Thorsen oqaaseqaasioqqusimallugu. Tassani John Thorsen-ip paasissutissiissutigaa, nunat tamalaat akornanni pissartannorgniuttoqarnissaani angissutsit piumasaqaataasoq FIFA-p piumasaqaataatut angitigissasoq, kisiannili Kalaallit Nunaata iluani unammersuarnermut, matumani Kalaallit Nunaanni pissartannorgniunnissanut tunngatillugu piumasaqaataassanngitsoq. Arsaattarfiit angissusissaannut tunngatillugu piumasaqaataasussat pillugit KAK takussutissiaqarpoq (ilanngussaq 2). Maniitsumi arsaattarfik qaartiterisoqarani 56 x 100 meterinngorsinnaavoq, taamaattumillu Kalaallit Nunaanni pissartannorgniunnissani arsaaffigineqarsinnaassalluni, soorlu tamanna John Thorsen-ip maileruteqarnermini uppernarsaraa.

*Arsaattarfiup angissusissaa pillugu innuttaasut isumaasa tusarnissaat siunertarlugu, atuarfiup inersuaani 2017-imi novembarip qulinngiluaani innuttaasunik ataatsimiisitsisoqarpoq. Takkussimasunut 40 missaaniittunut arsaattarfiit angissusissaannut periarfissat marluk TAAA-mi ilaasortanit saqqummiunneqarput. Ataatsimiinnermi oqallinnerup takutippaa, amerlanerussuteqartut FIFA-angissusissaatut angitigisumik arsaattarfittaarusuttut.*



*Nunatsinni arsaattarfiit ivigaaraasut allat angissusaat pillugit kiisalu Maniitsumi Nunatsinni pissartanngorniuttarsimanerit pillugit oqaluttuassartaani sunngiffimmi inspektøri paasissutissanik pissarsinikuuvoq. Naatsorsuinerit takutippaa, Illoqortoormiut eqqaassanngikkaanni, arsaattarfiit tamarmik FIFA-angissusissaatut 68 x 105 m-iusumut angissuseqartut imaluunniit angissusaat qanittuararsuusooq, taamaattorli Nanortalimmi aatsaat 2018-imi allineqassalluni.*

*Maniitsumi arsaattarfiup oqaluttuassartaa eqqarsaatigalugu, 1987-imi 1997-imilu angutit inersimasut unammersuarnikuupput aammalu 2010-mi inuusuttut. Taakku saniatigut arsaattarfiimmi Nunatsinni unammersuarnissanut anngunniunnerit arlallit ingerlanneqarnikuupput.*

#### Aningaasaqarnikkut allaffissornikkullu kingunerisinnaasai

Qaartiterisoqarani arsaattarfiup anginerpaaffigisinnaasaani ivigaaraasalersuisitsinissamut, 2.543.000 koruuninik immikkut aningaasaliissuteqartoqarnissaa pisariaqarpoq.

Angissusissatut FIFA-p piumasaqaataa naapertorlugu arsaattarfiup ivigaaraasalersorneqarnissaanut, 9.594.000 koruuninik immikkut aningaasaliissuteqartoqarnissaa pisariaqarpoq.

Qaartiterisoqarani arsaattarfik minnerusoq ivigaaraasalersorneqassasoq toqqarneqassappat, siunissami KAK-p piumasaqaatini allannngortissagaluarpagit arsaattarfik allilerneqarsinnaassaaq.

#### Allaffeqarfiup naliliinera

Nunap iluani unammersuarnissani arsaattarfiit angissusissaannut tunngatillugu KAK kisimi piumasaqaasiortarpoq. Piumasaqaatit qanoq ittuussanersut KAK-mi isummat assigiissimannngitsut paasinarsivoq, Kalaallit Nunaannili pissartanngorniuttoqarnissaanut arsaattarfiit FIFA-p piumasaqaataattut angitiginissaannik massakkut siulersuisut piumasaqaatiginngilaat.

#### Allaffeqarfiup innersuussutaa

Teknikkeqarnermut, Aatsitassarsiornermut Avatangiisinullu ataatsimiititaliamut, Aningaasaqarnermut ataatsimiititaliamut, Kommunalbestyrelsimullu innersuussutigineqarpoq, tulliuuttumi toqqaqqullugit:

1. 2.543.000 koruuninik immikkut aningaasaliissuteqarluni arsaattarfimmik 56 x 100 meterimik pilersitsisoqassasoq.
2. 9.594.000 koruuninik immikkut aningaasaliissuteqartoqarluni, FIFA-p piumasaqaataanut naapertuuttumik arsaattarfimmik 68 x 105 meterimik pilersitsisoqassasoq.

#### Teknikkeqarnermut, Aatsitassarsiornermut Avatangiisinullu ataatsimiititaliap suliamik suliarinninnera

Ataatsimiititaliap novembarip 13-ani 2017 ataatsimiinnerani innuttaasut kissaataat 68 x 105 meterimik pilersaarussiaq akuersissutigineqarpoq.

KAK radio-kkut ippassaq apersorneqarluni ivigaaraasanik arsaattarfiit pillugit tapiffigineqarsinnaanneranut periarfissaq ujartorneqassaaq.

Nunniornissamut pilersaarussiaq titartaganngorlugu ilanngunneqarnissaa kissaatigineqarpoq.

Akikinnerusumik qaartitinneqarsinnaanera misissoqquneqassasoq ataatsimiititaliap kissaatigivaa. Malene Ingemann siunnersuut 1 akuerivaa ikinnerussuteqarluni siunnersuut 2 akuerinngilaa.

### **Innersuussut**

Teknikkeqarnermut, Aatsitassarsiornermut Avatangiisinullu ataatsimiititaliap kommunalbestyrelsimut innersuussutigivaa akuereqqullugu,

- a. 68 x 105 meterimik pilersaarussiaq akuerineqassasoq
- b. Ivigaaraasanik arsaattarfiit pillugit tapiffigineqarsinnaanneranut periarfissaq ujartorneqassasoq
- c. Nunniornissamut pilersaarussiaq titartaganngorlugu ilanngunneqarnissaa akuerineqassasoq
- d. Akikinnerusumik qaartitinneqarsinnaanera misissoqquneqassasoq ataatsimiititaliap kissaatigivaa

### **Aalajangiineq**

### **Ilanngussat**

1. Gert Fleischer-imit allakkat 2017-imi septembarip arfernganeersut
2. John Thorsen-imit allakkat 2017-imi oktobarip 25-aneersut
3. Arsaattarfiit allat angissusaat oqaluttuassartarlu

**Imm. 06 Qeqqata Kommuniani Meeqqat illersuisuata angalaneranut nalunaarusiaq, 2017**

*Journalnr. 42.10.07*

Tunuliaqutaq

Meeqqat illersuisuat taassumalu suleqatigisai, 2017-imi apriliip 23-ianiit maajip arfernanut Qeqqata Kommuniata illoqarfiinut nunaqarfiinullu, Kangerlussuaq minillugu, meeqqat atugarisaat pillugit meeqqanik inersimasunillu oqaloqateqariartorlutik angalapput. Umiatsiamik angalaneq pissutigalugu Kangerlussuaq tikiinneqanngitsoorpoq.

Meeqqanut Illersuisup pisortaaffigivaa politikikkut naqisimaneqarani sullissivik MIO – Meeqqat Inuusuttullu Oqaloqatiginnittarfiat.

Meeqqat illersuisuat angalanermit tunngatillugu nalunaarusiaminik borgmesterimut, Ilaqutariinnermut Isumaginninnermullu siulittaasumut, Kommunimi pisortaanermit, Kommunimi pisortaanermit tullersortimut, Maniitsumi Sisimiunilu Ilaqutariinnermut pisortamut, Ilinniartitaanermit pisortamut Sisimiuni kommunip ataatsimiittarfiani 2017-imi oktobarip 18-iani saqqummiussivoq.

Maleruagassatigut tunngavissat

Meeqqat illersuisuat aamma Meeqqat pillugit Siunnersuisoqatigiit pillugit Inatsisartut inatsisaat nr. 11, 22. november 2011-meersoq, kiisalu Meeqqat pisinnaatitaaffii pillugit FN-ip isumaqatigiissutaa 20. november 1989-meersoq

Pissutsit atuuttut

Meeqqamut pisinnaatitaaffik aallaavigalugu nalunaarusiaq tullinnguuttutut eqikkarneqarsinnaavoq

1. meeqqap illersorneqarnissamik pisinnaatitaaffeqarnera
2. meeqqap ineriartornissamut atuarnissamullu pisinnaatitaaffeqarnera
3. meeqqap ikiorneqarnissamik pisinnaatitaaffeqarnera
4. pingaartumik nunaqarfinnut
5. Inerniliinerit inassuteqaatillu

Meeqqat illersuisuanit pingaarnertut naliliinerit tassaapput, angajoqqaanit ilaqutaasunit sumiginnaanerit pingasuusut

- Angajoqqaat, tarnikkut napparsimanertik pissutigalugu sumiginnaasut
- Angajoqqaat, ikiaroorartumik imigassamillu ajornartorsiuteqartut
- Angajoqqaat, meeqqamik perorsaaniissamik sakkussaaleqisut

Qeqqata Kommuniani annertuumik ikiaroorartup atugaanera, tarnikkut annersaasarnerup takussaanaera, aqqissuusinermit (sytem) sakkussamik piginnaasanillu amigaateqarneq, meeqqat kannqutsaatsuliorfigineqarsimasut naammattumik ikiorserneqarneq ajorput, meeqqat timikkut annersagaasarput aamma killeqanngitsumik, aammalu meeqqamut amigartumik perorsaaneq.

Meeqqat 56 pillugit nalunaarutigineqartut 49-uupput. Suliat amerlanerit Qeqqata Kommunianit ilisimaneqareerput, meeqqallu taakku aamma suliniarfigineqalereernikuullutik.

Meeqqat ilisimaneqarsimangitsut aamma ikiorneqareerput. Sisimiuni suliaq ataaseq pillugu angajoqqaanik oqaloqatiginnittarneq ingerlaavartumik ingerlavoq. Maniitsumi angerlarsimaffiup avataanut inissiinerit arlaqarput. Suliat tallimat malitseqartitsivigineqassapput.

MIO-mit inassuteqaatigineqartut tamarmik paasiuminarsarlugit ataatsimut nalunaarsorneqarput. Sisimiuni aamma Maniitsumi Ilaqutariinnermut Ilinniartitaanermullu immikkoortuni pisortasut tamarmik ataatsimiinnissamut aggersarneqarput, tassanilu inassuteqaatigineqartut tamarmik misissorneqarlutik, tamatumalu kingorna aqutsisoqatigiinnik suleqatigiissitanillu pilersitsisoqassalluni. Aqutsisoqatigiit kiisalu suleqatigiissitat/suliniuteqartussat inassuteqaatigineqartut immikkoortortaminni qanoq aallartinnissaannut suliaqassapput.

2018-imut missingersuutit Kommunalbestyrelsimit akuerineqareerpata, suliniummut sulisussamik ataatsimut, Sisimiuni isumaginninnikkut siunnersortinik marlunnik aammalu Maniitsumi isumaginninnikkut siunnersortinik marlunnik atorfirmut inuttassarsiortoqassaaq. Atorfiit taakku marluusut allaffeqarfimmut inissineqarlutik isumagineqassapput. Suliniummut sulisussaq suliniutinut arlalinnut ataqatigiissaaruullunilu aqutsisuusussaassaaq, ilatigut Qeqqata periuseq atorlugu. Isumaginninnikkut siunnersortimik siunertaavoq, allaffeqarfimmi aammalu atuarfimmi meeqqanik angajoqqaanillu isumaginninnikkut siunnersorneqarnissamik pisariaqartitsisunut oqaloqateqartarnissaaq.

Nalunaarusiaq naapertorlugu taaneqartutut Qeqqata Kommunian tamakkerlugu ikiaroorartumik ajornartorsiut assut annertuvoq, tamannalu pissutigalugu meeqqat atugarliortinneqartut, kiisalu ikiaroorartooq ajornangitsuaqqamik pissarsiarineqarsinnaasoq. Taamaattumik ikiaroorartumik ajornartorsiut qaanngiiffiginarlugu, 2017-imi oktobarip 19-iani borgmesteri politiinik suleqatiserinnilluni ataatsimeeqateqarpoq. Sisimiuni aamma Maniitsumi akitsuuserisunik atorfinitsitsisoqarnissaanik inassuteqaatitalimmik Naalakkersuisunut allakanik nassiussisoqarpoq.

#### Atuilluartuunissakkut kingunerisinnaasai

Qeqqata Kommunian meeqqat atugarliornerat atuilluartuunerunngilaq. MIO-p angalanermut atatillugu nalunaarusiaani inassuteqaatigineqartut isiginiarneqarlutik atuutilernissaannut suliniuteqartoqartariaqarpoq.

#### Aningaasaqarnikkut allaffissornikkullu kingunerisinnaasai

Inassuteqaatigineqartut tamakkerlugit aallartinneqarnissaannut tunngatillugu, aningaasartuutit annertussusissaat pillugit maannamuugallartooq oqaatigiuminaappoq.

#### Allaffeqarfiup naliliinera

Qeqqata Kommunian meeqqat atugarisaat pillugit angalanermut nalunaarusiap uppernarsaatitut pingaartutut allaffeqarfimmiit nalilerneqarpoq. Meeqqat illersuisua Kommuninut angalanera, taamaalillunilu meeqqat inuusuttullu avatangiisiat pillugu oqaloqatigalugit takullugillu, aammalu taamaalilluni Kommunimi nalinginnaasumik ilisimangisat takunerlu ajukkat pillugit oqaloqatiginnissimanerit qujanarput. Meeqqat/ilaqutariit qitiutillugit, ilaqutariinnut attuumassuteqartut tamarmik akimut suleqatiginerisigut suliassat kivinniarnissaannut isumaginninnikkut siunnersortinik amerlanerusunik atorfinitsitsinissamut Kommunalbestyrelsip aningaasanik amerlanerusunik immikkoortitsisimanagera allaffeqarfimmit nuannaarutigineqarpoq.

Akimortumik suleqatigiinnerup annertusarneratigut nukittorsarneratigullu meeraq/ilaqutasut pillugit immikkoortortat tamarmik, illup avataani immikkoortortat oqartussallu akimortumik

suleqatigiinnissaat pingaartorujussuuvoq. Angalanermut nalunaarusiaq ulluinnarni sulinermi sakkussatut atussavaat, aammalu inassuteqaatigineqartut atuutilernissaannut suliniutit suut aallartinneqassanersut nalunaarsorneqassallutik.

#### Allaffeqarfiup innersuussutaa

Angalanermi nalunaarusiaq Ilaqutariinnermut Isumaginninnermullu pissutsinut ataatsimiititaliamut saqqummiunneqassaaq.

#### Ilaqutariinnermut Isumaginninnermullu ataatsimiititaliap suliamik suliarinninnera

Ilaqutariinnermut Isumaginninnermullu ataatsimiititaliap novembarip 8-ni 2017 ataatsimiinenrmini aalajangiinera: MIO-mit nalunaarusiaq kinguneqartinniarlugu Ilaqutariinnermut Isumaginninnermullu Ataatsimiititaliaq siunnersuutigaa Kommunalbestyrelse november naalerpat Maniitsumi ataatsimiinnissaanut atatillugu seminar-imik ingerlatsisoqassasoq ukulu qulequtanngorlugit oqaluuserisassatut kissaatigineqarput:

- Isumaginnittoqarfimmi sulisut aningaasarsiaat
- Pisortanik ikiorsiissutit aningaasanngorlugit tunniunneqartarunnaartinneqarnissaat
- Angajoqqaat akisussaaffii/angajoqqaat illersuisuat
- Oqaloqatiginnittarneq/terapeutinik meeqqat atuarfiani atorfinittitsineq
- Suligasuartarneq

#### **Innersuussut**

Innersuussutigineqarpoq,

-nalunaarusiaq kommunalbestyrerlsip eqqartussagaa

-MIO-p innersuussutai naapertorlugit suliniutinik aallartitsinissamut suleqatigiisitat aallaaviglugit, ilaqutariinnermut ataatsimiititaliaq ukiup nikinnerani isumasioqatigiinnissamik/workshop-imik ingerlatsissasoq

#### **Aalajangiineq**

#### **Ilanngussat**

1. Qeqqata Kommuniani Meeqqat illersuisuata angalaneranut nalunaarusiaq, 2017
2. Inassutigineqartunut takussutissiaq

**Imm. 07      Arnangarnup Qooruani eqalunniarnissamut immikkut akuersissuteqaler-sinnaanissaq, tammajuitsussarsisitsiniarlunilu piniariartitsisinnaalersitsinissaq**

*Journalnr. 73.15*

Tunuliaqutaq

Qissattarluni aalisartitsinissamut (eqalunniartitsinissamut), tammajuitsussarsisitsiniarlunilu piniariartitsisarnissamut (umimmanniartitsinissamut) Arnangarnup Qooruani ammaassisoqarsinnaannginnersoq pillugu Qeqqata Kommunia takornarialerisunit arlalinnik apeqquteqaatinik tigusinikuuvoq. Ukiuunerani timersuutit, soorlu sisorartitsisarnissat aamma soqutigineqarput.

Qinnuteqaatinik taama ittunik suliaqarnermi, sammisassatut qinnuteqaatigineqartumut pilersarusiortoqassanersoq, nunaminertanilu qinnuteqaatigineqartuni akuersissutinik neqeroortitsisinnaanermik periarfissiisumik kommunip pilersarusiorfigineqarnerani tapiliussamik suliaqartoqassanersoq Qeqqata Kommunia (aningaasaqarnermut ataatsimiititaliaq) isummertarpoq. Naalackersuisut malittarisassai, suleriaasiilu malinneqartariaqassapput.

Maleruagassatigut tunngavissat

- 1: Kalaallit Nunaata Kitaani, Maniitsup kommuneani, Arnangarnup Qooruata allanngutsaaliorneqarnera pillugu Namminersornerullutik Oqartussat nalunaarutaat nr. 31 ulloq 20. oktober 1989-imeersoq.
- 2: Pinngortitamik illersuineq pillugu Inatsisartut Inatsisaat nr. 29, 18. december 2003-meersoq, § 17 Eqqissisimatitsinerit atorunnaarsitaaneri aammalu allanngortinneqarneri.
- 3: Sumiiffinni nunami aalajangersimasuni takornariartitsinermut akuersissuteqartarnissaq pillugu Inatsisartut inatsisaat nr. 19, 3. december 2012-meersoq
- 4: Sumiiffinni nunami aalajangersimasuni takornariartitsinermut akuersissuteqartarnissaq pillugu Inatsisartut inatsisaat nr. 19, 3. december 2012-imeersup allanngortinnissaa pillugu Inatsisartut inatsisaat nr. 15, 3. juni 2015

Pissutsit atuuttut

"Kalaallit Nunaata Kitaani, Maniitsup kommuneani, Arnangarnup Qooruata allanngutsaaliorneqarnera pillugu Namminersornerullutik Oqartussat nalunaarutaat nr. 31 ulloq 20. oktober 1989-imeersoq" naapertorlugu, Arnangarnup Qooruani pinngortitap kusanassua kiisalu kulturikkut ilisimatusarnikkullu pingaaruteqassusia patsisaalluni allanngutsaaligassanngortinneqar-nikuuvoq. Nalunaarut taanna naapertorlugu naasut uumasullu ukioq naallugu aamma eqqissisimatitaapput. Illukut, ilerit, allallu qangarnitsanut eqqaassutissat imaaliinnarlugit peerneqarsinnaanngitsut aamma innarlerneqassanngillat, soorluttaaq naasunik, nassunnik, niaqqut saarnginik qangarnitsanillu tamanik katersinissaq inerteqqaasooq.

"Kalaallit Nunaata Kitaani, Maniitsup Kommuneani, Arnangarnup Qooruata allanngutsaaliorneqarnera pillugu Namminersornerullutik Oqartussat nalunaarutaanni 1989-imi oktobarip 20-aneersumi" § 5 naapertorlugu, Naalackersuisut Maniitsumi kommunalbestyrelsip isumasioqatigereerneragut aalajangersakkanik siuliani taakkartorneqartuni allassimasunik saneqqutsisitsinissaapput.

Arnangarnup Qooruani qissattarluni eqalunniartitsisalernissamik, tammajuitsussarsisitsiniarlunilu piniariartitsinissamik ammaassissagaanni, Kalaallit Nunaata Kitaani, Maniitsup Kommuneani, Arnangarnup Qooruata allanngutsaaliorneqarnera pillugu Namminersornerullutik Oqartussat

nalunaarutaanni 1989-imi oktobarip 20-aneersaq allannortinneqanngikkuni, immikkut akuersissuteqartartariaqassaaq.

Taamaattoq "Kalaallit Nunaata Kitaani, Maniitsup Kommuneani, Arnangarnup Qooruata allannugtsaaliorneqarnera pillugu Namminersornerullutik Oqartussat nalunaarutaat 1989-imi oktobarip 20-aneersaq" atuuttoq allannortissagaanni, Arnangarnup Qooruata ammaanneqarneratigut takornarialerisut qissattarluni eqalunniartitsisalernissaannut, tammajuitsussarsitsiniarluni piniariartitsisarnissaannut, immaqalu sisorartitsisalernissaannut akuersissutinik tunniussisoqarsinnaalissaaq.

#### Atuilluartuunissakkut kingunerisinnaasai

Arnangarnup Qooruani akuersissutinik neqerooruteqarsinnaanerup ammaanneqarneratigut, Qeqqata Kommuniani takornarialerineq aningaasaqarnikkut atuilluartumik inuutissarsiutitut ineriartorsinnaalissaaq tapersorsorneqarsinnaalissallunilu. Ilutigalugu siunissami takornarialerisunut akuersissutinik neqerooruteqartalissagaanni, immikkoortumi sammisat tamarmik pinngortitamut sunniuteqarnerlugatik atuilluartumik tunngaveqarnissaat piunasaqaataassaaq.

Taamaattumik akuersissutinik neqerooruteqassagaanni, naasut uumasullu, qanganitsat, angallanneq, unnuisoqartassappallu unnuisarnissat qulakkeerneqassapput, malittarisassiuunneqassapput, nakkutigineqarlutillu. Akuersissutinik neqerooruteqarnermi inuiaqatigiit isigalugit atuilluartuunissaaq, akuersissutini ataasiakkaat najugaqavissut akuutinneqarnerisigut qulakkeerneqassaaq.

#### Aningaasaqarnikkut allaffissornikkullu kingunerisinnaasai

Akunnerit 60-it missaaniittut allaffissornikkut suliffissat eqqaassanngikkanni, pilersaarummik siunnersuusiornermi Qeqqata Kommunianut toqqaannartumik aningaasaqarnikkut allaffissornikkullu kinguneqassanngilaq. Nunaminertani akuersissuteqarfiusuni atortulersuutit pilersinneqartussat, akuersissummik pigisaqartut ataasiakkaat suliniuteqarnerisigut pilersinneqassapput.

Aallaavigisaaq tassaavoq, takornarissanut sammisassat sumiiffinni najugalinnut suliffissanik akileraarutitigullu isaatitassanik nutaanik pilersitsinissaat.

Neqeroortitsinermi atortussat nassiuussuunneqarpata, suliffeqarfiit Kalaallit Nunaanni nalunaarsorsimasut kikkulluunniit akuersissutinik qinnuteqarsinnaapput.

#### Allaffeqarfiup naliliinera

Allaffeqarfiup nalilerpaa, najugaqavissut aningaasarsiornissaat, atuilluartuunissaaq, siunissamilu sammisassat periarfissagissaalersitsisussat eqaatsuunissaat tunngavissiumallugu, immikkoortoq qanoq aaqqissuunneqassanersoq ersarinnerusumik misissorneqartariaqartoq.

Arnangarnup Qooruani takornarialerisoqarsinnaanissaanut ammaassinissamik, pilersaarutitigullu tunngavissaliortoqarnissaanik aalajangiisoqassappat, takornarissanut sullissinerit imminut akilersinnaanissaat qulakkeerumallugu, sumiiffimmi takornarissanut neqeroorutaasinnaasut ataatsimoortinneqarnissaannut periarfissat ilutigalugu nalilersorneqartariaqarput. Matumani aasaanerinnarmi sammisassaanatik, ukiup annersaani sammisassat ingerlanneqarsinnaasut eqqarsaatigineqarput.

Allaffeqarfiup innersuussutaa

Aningaasaqarnermut ataatsimiititaliamit akuereqqullugu allaffeqarfiup innersuussutigaa,

-qinnuteqartut kiisalu Inussutissarsiornermut, Suliffeqarnermut Niuernermullu Naalakkersuisoqarfik ima nalunaarfigineqassasut,

- A. Arnangarnup Qooruani takornialerisoqarsinnaanissaanik ammaassisoqarnissaanik, taamaalillunilu ilaatigut allanngutsaaliorneqarnerata siunertaata allanngortinneqarneratigut, allanngutsaaliorneqarnerata atorunnaarsinneqarnissaanik Qeqqata Kommunia qinnuteqarniartoq,
- B. Arnangarnup Qooruanut tunngatillugu kommunip pilersaarusiordfigineqarneranut tapiliussassatut siunnersuummik Qeqqata Kommunia suliaqarniartoq,
- C. Pinngortitamik illersuineq pillugu Inatsisartut Inatsisaanni nr. 29-mi, 18. december 2003-meersumi, § 17-imi Eqqissisimatitsinerit atorunnaarsitaaneri aammalu allanngortinneqarneri pillugu malittarisassat periusissiallu Qeqqata Kommuniata malissagai
- D. kommunip pilersaarusiordfigineqarneranut tapiliussassatut siunnersuut 2018-ip upernaani kommunalbestyrelsimut saqqummiunneqassasoq, malitsigisaanillu sapaatit akunnerini arfineq-pingasuni tamanut tusarniutigineqassasoq'

Aningaasaqarnermut ataatsimiititaliap suliamik suliarinninnera

Ataatsimiititaliap novembarip 14-ani 2017 ataatsimiinnerani innersuussut akuersissutigineqarpoq.

**Innersuussut**

Aningaasaqarnermut ataatsimiititaliap kommunalbestyrelsimut innersuussutigivaa akuereqqullugu,

-qinnuteqartut kiisalu Inussutissarsiornermut, Suliffeqarnermut Niuernermullu Naalakkersuisoqarfik ima nalunaarfigineqassasut,

- A. Arnangarnup Qooruani takornialerisoqarsinnaanissaanik ammaassisoqarnissaanik, taamaalillunilu ilaatigut allanngutsaaliorneqarnerata siunertaata allanngortinneqarneratigut, allanngutsaaliorneqarnerata atorunnaarsinneqarnissaanik Qeqqata Kommunia qinnuteqarniartoq,
- B. Arnangarnup Qooruanut tunngatillugu kommunip pilersaarusiordfigineqarneranut tapiliussassatut siunnersuummik Qeqqata Kommunia suliaqarniartoq,
- C. Pinngortitamik illersuineq pillugu Inatsisartut Inatsisaanni nr. 29-mi, 18. december 2003-meersumi, § 17-imi Eqqissisimatitsinerit atorunnaarsitaaneri aammalu allanngortinneqarneri pillugu malittarisassat periusissiallu Qeqqata Kommuniata malissagai
- D. kommunip pilersaarusiordfigineqarneranut tapiliussassatut siunnersuut 2018-ip upernaani kommunalbestyrelsimut saqqummiunneqassasoq, malitsigisaanillu sapaatit akunnerini arfineq-pingasuni tamanut tusarniutigineqassasoq'

**Aalajangiineq**

**Ilanngussat**

1. Kalaallit Nunaata Kitaani, Maniitsup kommuneani, Arnangarnup Qooruata allanngutsaaliorneqarnera pillugu Namminersorerullutik Oqartussat nalunaarutaat nr. 31 ulloq 20. oktoberimeersoq



**Imm. 08 Qeqqata Kommunianut Kukkuersuisut nalunaarutaat nr. 26**

*Journalnr. 06.04.01*

Tunuliaqutaq

BDO Kukkuersuisut tulliuuttut nassiuppai

- 2016-imut kommunit naatsorsuutaanni Namminersorlutik Oqartussani suliaqarfinnik Kukkuersuineq pillugu nalunaarut nr. 25 - Ukiumut naatsorsuseriffiusumut 2016-imut nalunaarut ilaannakortoq
- 2016-imi naatsorsuutit kukkuersiorneqarnerat pillugu nalunaarut nr. 26 - Ukiumut naatsorsuseriffiusumut 2016-imut inaarutaasumik kukkuersuineq

Aningaasaqarnermut pisortap allakkatigut 2017-imi septembarip qulingiluaaneersutigut ataatsimiititaliat piumaffigai, susassaqrarfinni iluini Kukkuersuisut oqaaseqaataannut akissuteqaasiussasut.

Maleruagassatigut tunngavissat

Aqutsinermut inatsimmi § 48 imm. 5 naapertorlugu, kukkuersuisut oqaaseqaataat kommunalbestyrelsimit akineqartussaataapput, aalajangiisoqareerpallu akissuteqaatit Nakkutilliisoqarfinnut nassiunneqassallutik.

Pissutsit atuuttut

Teknikkeqarnermut, Aatsitassiornermut Avatangiisinullu ataatsimiititaliamut tunngatillugu kukkuersuisut nalunaarutiminni nr. 25-mi oqaaseqaasiorsimangillat.

Kukkuersuisut nalunaarumminni nr. 26-mi, Teknikkeqarnermut, Aatsitassarsiornermut Avatangiisinullu ataatsimiititaliap akisussaaffiinnut marlussunnik oqaaseqaasiorsimapput:

Isumaqatigiissutinut (imm. 1.5.2.4) pillugit tullinnguuttutigut kukkuersuisut oqaaseqaateqarput: "Ingerlatsinerit arlaqartut kommunip namminersortunngorsarnikuuai.

Tuniniaasunut namminersortunut isumaqatigiissutigineqartuni immikkoortunik Kukkuersuisut misissuisimapput. Misissuinermit kukkuluttortarnerit tullinnguuttut saqqummiunneqarput:

- Ukiumut akitigut naleqqussaannissamut tuniniaasoq kommunilu isumaqatigiinngillat
- Akitigut naleqqussaannissamut kukkusumik naatsorsuisoqartarpoq
- Akitigut naleqqussaasoqarsimangilaq
- Isumaqatigiissut atorunnaarsimavoq, tuniniaasumullu akiliisarneq suli ingerlalluni.

Kukkuersuisut innersuussutigaat, isumaqatigiissutinik kommunip aqutsinini sukateriffigissagaa. Isumaqatigiissutit arlaqartut, piffissami sivisoorujussuarmi atorunnaarsinneqarsinnaaneq ajorput.

Aqutsinermut inatsisip § 47-ani imm. 1-imi nr. 1 naapertorlugu kukkuersuisut innersuussutigaat, pisussaaffik misissoriarlugu ukiumoortumik nalunaarummi paasisutissiissutigineqassasoq". Oqaatigineqassaaq, siullertut eqqaaneqartut marluk Teknikkeqarnermut, Aatsitassarsiornermut

Avatangiisinullu ataatsimiititaliap akisussaaffiisa ataaniinngimmata, taamaattorli naleqqussaaneq isumaqatigiissutillu atorunnaarsimaneri ataatsimiititaliap akisussaaffiisa iluaniillutik.

Isumaqatigiissut atorunnaarsimasoq eqqarsaatigalugu, Teknikkeqarnermut, Aatsitassarsiornermut Avatangiisinullu ataatsimiititaliamit aalajangiiffigisassanngorlugu saqqummiunneqarnikuunngitsaq, isumaqatigiissut naapertorlugu tuniniaasup ingerlatsinini ingerlatiinnarsimavaa.

Sanaartornermut tunngasut pillugit tullinnguuttutigit kukkunerisuiusut oqaaseqaateqarput (imm. 1.5.2.5):

"Sanaartukkani naammassinikuni ingerlasunilu misissuinitinnut atatillugu paasivarput, Namminersorlutik Oqartussanit tapiissutit 3.226 t. koruunit 2016-imi decembarip 31-ani utertinneqarsimangitsut, isertitatullu allanneqarsimangitsut.

Aningaasat annertunersaat Maniitsumi innarluutilinnut inissianut tunngassuteqarput. Piffissalersuineq, akiliisinnaassuseqarnerli aamma ilanngullugu kukkunerisuiusut innersuussutigaa, Namminersorlutik Oqartussanit sanaartornermut tapiissutit utertitassat akulikinnerusumik utertinneqartassat, matumani aamma ukiumut naatsorsuutit naammassineqarnerinut atatillugu."

#### Atuilluartuunissakkut kingunerisinnaasai

Ineriartortitsinerup atuilluarp kingunerissavaa, kukkunerisuiusut oqaaseqaatit ikilinerat.

#### Aningaasaqarnikkut allaffissornikkullu kingunerisinnaasai

Teknikkeqarnermut, Aatsitassarsiornermut Avatangiisinullu ataatsimiititaliap akisussaaffiisa iluini kukkunerisuiusut oqaaseqaataat, kommunip aningaasaqarneranut annikitsumik sunniuteqarpoq.

Isumaqatigiissutinik nakkutiginninnermi akitigit naleqqussaasoqarneq ajorpat, kommunip aningaasartuutai annikinnerussapput. Sanaartortitsinermi utertitassat suli utertinneqanngitsuni erniaritinneqartoq ima annikitsigaaq, utertitassat ingerlaannaq utertinneqaraluarpataluunniit nikinganera annertunaviarani. Utertitassat eqqortumik tiguneqartarnissat pingaarneruvoq.

Kukkunerisuiusut tungaanninngaaniit oqaaseqaateqartarnissaq pisariaqarmat, allaffissornikkut naammagisimaarnangilaq.

#### Allaffeqarfiup naliliinera

Isumaqatigiissutinik aqutsineq pillugu oqaaseqaat eqqarsaatigalugu, akitigit naleqqussaasoqarumaarpoq. Isumaqatigiissutit sivitsorneqarnissat pillugu ataatsimiititaliamut suliamik saqqummiussineq ajornermut tunngatillugu oqaaseqaat eqqarsaatigalugu, ataatsimiititaliap matoqqasumik ataatsimiinnissaani suliaq aalajangiiffigisassanngorlugu saqqummiunneqassaaq.

Sanaartortitsinermit tunngatillugu oqaaseqaat eqqarsaatigalugu, utertitassat eqqortut utertinneqarput. Namminersorlutik Oqartussanit tapiissutinik tigusinissamik suliat piffissamik atuinartarput, taamaattumillu taakkunanngarnit suliat nukinginnarnerusut salliunneqakkajunne-rusarlutik. Sanaartortitsinermit suliap naammassineqarnerani tapiissutit tamakkiisut tiguneqartarnissaa pingaartumik eqqumaffigineqartarpoq, tamakkulu eqqumaffigineqartuannarlutik. Namminersorlutik Oqartussanit tapiissutit naatsorsorneqarnerat, sanaartortitsinermit inaarutaasumik naatsorsuutini allassimasarput.

#### Allaffeqarfiup innersuussutaa

Teknikkeqarnermut, Aatsitassanut Avatangiisinullu ataatsimiititaliamut innersuussutigineqarpoq, allaffeqarfiup naliliinerata ataani kukkunerisuiusut nalunaarutaannik akissuteqaatissatut siunnersuutitut saqqummiunneqartoq akuersissutigineqassasoq

Teknikkeqarnermut, Aatsitassarsiornermut Avatangiisinullu ataatsimiititaliap suliamik suliarinninnera

Ataatsimiititaliap novembarip 7-ani 2017 ataatsimiinnermini innersuussut akuersissutigivaa allaffeqarfimmilu sukaterinissaq inassutigineqarluni.

Teknikkeqarnermut, Aatsitassarsiornermut Avatangiisinullu ataatsimiititaliap innersuussutaa

Teknikkeqarnermut, Aatsitassarsiornermut Avatangiisinullu ataatsimiititaliap Aningaasaqarnermut ataatsimiititaliamut innersussutigivaa akuereqqullugu,

- allaffeqarfiup naliliinerata ataani kukkunerisiuisut nalunaarutaannik akissuteqaatissatut siunnersuutitut saqqummiunneqartoq akuersissutigineqassasoq

Aningaasaqarnermut ataatsimiititaliap suliamik suliarinninnera

Ataatsimiititaliap novembarip 14-ani 2017 ataatsimiinnerani innersuussut akuersissutigineqarpoq.

### **Innersuussut**

Aningaasaqarnermut ataatsimiititaliap kommunalbestyrelsimut innersuussutigivaa akuereqqullugu,

- allaffeqarfiup naliliinerata ataani kukkunerisiuisut nalunaarutaannik akissuteqaatissatut siunnersuutitut saqqummiunneqartoq akuersissutigineqassasoq

### **Aalajangiineq**

### **Ilanngussat**

- 1.Kukkunerisiuisut nalunaarutaat nr. 25
- 2.Kukkunerisiuisut nalunaarutaat nr. 26

**Imm. 09 Sisimiuni Akiani najugaqarfissiassamut kiisalu meeraaqqeriviliorfissamut/meeqqrivissamut kommunip pilersaarusiordfigineqarneranut tapiliusaaq nr. 25-ssatut siunnersuut**

*Journalnr. 16.03.01.01*

Tunuliaqutaq

Sisimiuni ilaqutariinnut ataatsinut illut amigaatigineqarput, 2018-imullu missingersuutini Akiani nutaamik meeqqeriviliorfissamut aningaasanik immikkoortitsisoqarluni. Pisariaqartitat taakku naammassiumallugit, nunaminertallu pingaarnertut sanaartorfissagissarneqareersut atorluarumallugit kommunip pilersaarusiordfigineqarneranut tapiliusaaq nr. 25 suliarineqarpoq.

Maleruagassatigut tunngavissat

Pilersaarusiordfigineq aamma nunaminertat atorneqartarnerat pillugu Inatsisartut inatsisaat nr. 17, 17. novembari 2010-imeersoq, inatsimmut allannguutit ilanngullugit naapertorlugit kommunip pilersaarusiordfigineqarneranut tapiliusaaq suliarineqarpoq.

Pissutsit atuuttut

Kommunip pilersaarusiordfigineqarnerani immikkoortut 800-A30 aamma 800-C18 pineqarput. Kommunip pilersaarusiordfigineqarneratigut ataatsimut siunertanut immikkoortut marluk, 800-C16 aamma C17, immikkoortoq 800-A30-mut allanngortinneqarput.

Kommunip pilersaarusiordfigineqarneranut tapiliusaaq nr. 25-kkut ilaqutariinnut ataatsinut illut aappaa avillugu quleriilinnut 25-nut, meeqqerivimmullu 900 m<sup>2</sup>-imik angitigisumut, katillugit 5625 m<sup>2</sup>-it immikkoortinneqarput.

Nunataa maniilakulattuuvooq, sanaartugaqaranilu.

Mittarfiup nalaani timmisartut mittarfimmut mikkiartortarfiisa, mittarfimmiillu tingisarfiisa nalaanni pallinneqaaqusaanngitsoq unammillernartoqarpoq, qaaqarluk 57 meterinik portutigimmat, pingaartumik qummut 55 meterinik portutigisooq pallinneqaaqusaanngitsoq unammillernartoqarpoq.

Tamassuma iluarsivigineqarnissaanut periarfissat marluupput; meeqqerivissamut kote 60, inissiassamullu kote 65 tikillugu sanaartortitsinissaminut Qeqqata Kommunian ilaatigut

Angallannermut Aqutsisoqarfimmut immikkut akuerineqarnissaminik qinnuteqarsinaavooq.

Kommunip pilersaarusiordfigineqarneranut tapiliussassatut siunnersuutigineqartumi allaffeqarfiup siunnersuutigisaatut, immikkut akuersissummik tunineqarnissamut tunngavissaqarluarpoq.

Immikkoortumi sanaartorfissaaq appartikumallugu aamma qaartiterisoqarsinnaavooq.

Qaartiterisoqassappat, qaartiterinermi ujaqqat Akiani sumiiffinni assigiinngitsuni nalimmassaalluni immiissutissatut atorneqarsinnaalluarpot.

Sanaartortitsinissami portussusissaaq Angallannermut Aqutsisoqarfimmit isumaqatigiissutigineqariapat, qaartiterisoqarnissaanut sanaartorfissagissaasoqarnissaanullu suliniutissaaq suliarineqassaaq.

Pinnguarfissaqqissunut, nunalu tikikkuminarmata, najugaqarfissiami pinnguartarfissamut nunaminertanik immikkoortitsisoqarnikuunngilaq. Ilaatigut meeqqerivissap pinnguartarfissaani, ilaatigullu najugaqarfissiap piusup, asiartarfiullu eqqaani.

Atuilluatuunissakkut kingunerisinnaasai

Najugaqarfissani nukissiuutinik ataavartunik soorlu seqinisaatinik assigisaannillu atuinissamut periarfissaqarpoq, inissianilli nutaanik sanaartornerit ataatsimut takutippaat, silaannarissarfinnik ilusilersorluakkanik illunik ussissunik oqorsarluakkanillu sanarusunnikkut annertuumik kissamik atuinermut annikillisaataasarteq.

Aningaasaqarnikkut allaffissornikkullu kingunerisinnaasai

Sanaartorfissagissaasitsinissaq Qeqqata Kommunianit aningaasaliiffigineqassasoq naatsorsuutigineqarpoq, kisianni tamakkiisumik sanaartorfissagissaasitsinermi aningaasartuutit, sanaartorfissani ataasiakkaani m2-i naapertorlugu sanaartorfissagissaasitsinermi aningaasartuutit agguataarneqarnerisigut, sanaartorfissani ataasiakkaani sanaartortitsisussat akiliutissaat aalajanger-sarneqartarpoq, taamaattumillu kommuni aningaasaliinera akiliussigallarneruinnassalluni.

Meeqqerivissaq kommunimit tamakkiisumik aningaasaliiffigineqartussaammat, naatsorsuinerni tassani meeqqerivissaq ilanngunneqassanngilaq.

Allaffeqarfiup naliliinera

Allaffeqarfiup nalilerpaa, najugaqarfissiamik soqutigintumik pilersitsinissamut pilersaarut tunngavissisinnaasoq, pitsaasunillu pinnguartarfeqarnissanik, meeqqerivimmiillu toqqaannartumik nunaliarsinnaanissamut pisariaqartitanik, meeqqeriviup inissinnissaa naammassinnissinnaasoq.

Allaffeqarfiup innersuussutaa

Allaffeqarfiup innersuussutigaa Aningaasaqarnermut ataatsimiititaliamut akuereqqullugu,

-Kommunip pilersaarusiordfigineqarneranut tapiliussatut nr. 25-tut siunnersuut aningaasaqarnermut ataatsimiititaliamit kommunalbestyrelsimiillu akuerineqariarpat, sapaatit akunnerini arfineq-pingasuni tamanut tusarniutigineqassasoq

-Kommunip pilersaarusiordfigineqarneranut tapiliussassatut siunnersuut naapertorlugu, portussuseq 55 meteriusoq pallinneqaqqusaanngitsoq qaangerlugu sanaartortoqarsinnaanissaanik immikkut akuersissummik qinnuteqartoqassasoq

Aningaasaqarnermut ataatsimiititaliap suliamik suliarinninnera

Ataatsimiititaliap novembarip 14-ani 2017 ataatsimiinnerani innersuussut akuersissutigineqarpoq.

**Innersuussut**

Aningaasaqarnermut ataatsimiititaliap kommunalbestyrelsimut innersuussutigivaa akuereqqullugu,

Kommunip pilersaarusiordfigineqarneranut tapiliussatut nr. 25-tut siunnersuut aningaasaqarnermut ataatsimiititaliamit kommunalbestyrelsimiillu akuerineqariarpat, sapaatit akunnerini arfineq-pingasuni tamanut tusarniutigineqassasoq

-Kommunip pilersaaruserfigineqarneranut tapiliussassatut siunnersuut naapertorlugu, portussuseq 55 meteriusoq pallinneqaqqusaanngitsoq qaangerlugu sanaartortoqarsinnaanissaanik immikkut akuersissummik qinnuteqartoqassasoq

### **Aalajangiineq**

### **Ilanngussat**

1. Kommunip pilersaaruserfigineqarnerani tapiliusseq nr. 25-ssatut siunnersuut.

**Imm. 10 Kangerlussuup kangiani unnuisarfefarfissamut / illuaraqarfissamut kommunip pilersarusiorfigineqarnerani tapiliusaaq nr. 29-ssatut siunnersuut**

*Journalnr. 16.03.01.01*

Tunuliaqutaq

Kangerlussuup eqqaani ilaatigut takornarissanut attartortitassanik, ilaatigullu nammineq atugassanik illuaqqiortoqarnissaanut periarfissanik ujartuisunik ataavartumik apeqqutilliisoqartarpoq. Pisariaqartitat taakku naammassiumallugit, kommunip pilersarusiorfigineqarneranut tapiliusaaq una suliarineqarpoq. Ilutigalugu 2014-imut pilersarusiornermi periusissiamut naapertuullin-narpoq, takornarialerinemimi periarfissat, innuttaasullu pinngortitamik atuinissamut periarfissaasa annertusineqarnissaat anguniarneqarmat.

Maleruagassatigut tunngavissat

Pilersarusiorneq aamma nunaminertat atorneqartarnerat pillugu Inatsisartut inatsisaat nr. 17, 17. novembari 2010-imeersoq, inatsimmut allannguutit ilanngullugit naapertorlugit kommunip pilersarusiorfigineqarneranut tapiliusaaq suliarineqarpoq.

Pissutsit atuuttut

Kommunip pilersarusiorfigineqarnerani tapiliussami immikkoortut pineqartut Sugar Loaf-imi aamma Russels Gletcher-imi inissisimapput. Russel-imi unnuisarfiliortoqarnissaanut, illuaraqarfiliortoqarnissaanulluunniit nunaminertanik ulloq manna tikillugu immikkoortita-qareerpoq, nunaminertalli taakku sunngiffimmi illuaqqanik, ilisimatusarnermi illuaqqanik sanaartortoqarsinnaaneranut maanna annertusineqarlutik. Sugar Loaf-imi nunaminertat illuaqqiorfissatut, unnuisarfiorfissatut, attartortitassanillu illuaqqiorfissatut immikkoortinne-qassapput. Kommunip pilersarusiorfigineqarnerani tapiliussassatut siunnersuutitigut, illuaqqat katillugit 154-it, taakkunanga illuaqqat 48-t illuaraqarfimmiillutik unnuisarfinnut taarsiullugit sanaartorneqarsinnaalissapput.

Illuaqqat annerpaamik 80 m<sup>2</sup>-iussatut, immikkoortumili ataatsimi annerpaamik 40 m<sup>2</sup>-iussatut pilersaarutitigut anguniarneqarpoq. Immikkoortut tungaannut, immikkoortullu ataasiakkaatigut asfaltigaanngitsumik aqqusinniortoqaannarneratigut sanaartorfigissaasoqartariaqarpoq.

Pilersuinissat sinneri, sanaartukkanut ataasiakkaanut, pilersuinernulluunniit tunngatillugu sanaartortitsisut suleqatiginissinnaatillugit, inunnit nammineq isumagineqassasut naatsorsuutigineqarpoq.

Unnuisarfinnut / illuaraqarfinnut immikkoortut tamarmik, pkt. 660-imut aqqusinermit ersissanngillat. Sugar Loaf-ip kitaa-tungaani immikkoortoq aqqusinermit kisimi ersissaaq.

Sugar Loaf-ip kitaa-tungaani imassanik qaarsimanngitsunik qanoq annertutigisumik peqarnersoq misissorniarneqarnikuuvoq. Tamanna suli iluatsinngilaq, taamaattumillu kommunip pilersarusiorfigineqarneranut tapiliussassap inaarutaasumik akuersissutigineqarnissaanut atatillugu unammillernarsinnaasut iluamik paasisaqarfigiumallugit, tusarniaaffigineqarnerata nalaani tamanna anguniarneqassalluni.

Kommunip pilersarusiorfigineqarneranut tapiliussatigut nr. 29-kkut, immikkoortuni K55-imi, K56-imi K59-milu immikkoortut unnuisarfissanut illuarassanullu katillugit 750.000 m<sup>2</sup>-it

immikkoortinneqassapput. Ataatsimut isigalugu 11900 m<sup>2</sup>-inik sanaartortoqarsinnaanissaa pilersaarutitigut periarfissanngussaaq.

Kommunip pilersaarusionerfigineqarneranut tapiliussassap inaarutaasumik suliarineqarnissaa sioqqullugu, pilersaarutissatut takussutissaq Kangerlussuarmi nunaqarfimmi aqutsisunut tusarniutigineqarnikuuvoq, nunaqarfimmilu aqutsisut oqaaseqaataat ilanngussatut ilanngunneqarluni.

#### Atuilluartuunissakkut kingunerisinnaasai

Najugaqarfissani nukissiuutinik ataavartunik soorlu seqinisaatinik assigisaannillu atuinissamut periarfissaqarpoq, inissianilli nutaanik sanaartornerit ataatsimut takutippaat, silaannarissarfinnik ilusilersorluakkanik illunik ussissunik oqorsarluakkanillu sanarusunnikkut annertuumik kissamik atuinermut annikillisaataasartoq.

#### Aningaasaqarnikkut allaffissornikkullu kingunerisinnaasai

Katillugit 11,2 mio. koruunit nalinganut, assigiinnarpaa kilometerimut 1 mio. koruunit nalinganut sanaartorfigissaanissaq, asfaltigaanngitsumillu aqquinniorinissaq Qeqqata Kommunianit aningaasaliiffigineqassasoq naatsorsuutigineqarpoq, kisianni kommunip aningaasaliissutimigut akiliussigallartussannguinnaarlugu, m<sup>2</sup>-it sanaartorneqarsinnaasut naapertorlugit sanaartorfigissaa-nermut akiliutissat aalajangersarneqarnerisigut, sanaartortitsisunit ataasiakkaanit akilerneqassalluni. Kommunip akiliussigallarnera killilersimaarumallugu, aningaasartuutissat ukiunut arlalinnut agguataarneqassasut, isertitassallu ilaat qulakkeerneqarsimatillugit aningaasartuuteqartoqartassasoq naatsorsuutigineqarpoq. Oqaatigineqassaaq, aqqusinniassamut aningaasartuutissat missingersuutaaginnarmata, taamaattumillu sumiiffiit ilaannut aningaasartuutissat annikinnerusinnaassallutik.

#### Allaffeqarfiup naliliinera

Allaffeqarfiup nalilerpaa, Kangerlussuup kangiani pisariaqartitanik ukiorpaalunni naammassisinnaanngorluni, soqutiginarunik unnuisarfiliorinissanut / illuaqqiorinissanut pilersaarut tunngavissiissasoq.

#### Allaffeqarfiup innersuussutaa

Allaffeqarfiup Aningaasaqarnermut ataatsimiititaliamut innersuussutigaa akuereqqullugu,

-kommunip pilersaarusionerfigineqarneranut tapiliussaq nr. 29-ssatut siunnersuut aningaasaqarnermut ataatsimiititaliamit kommunalbestyrelsimiillu akuerineqareerpat sapaatit akunnerini arfineq-pingasuni tamanut tusarniutigineqassasoq

#### Aningaasaqarnermut ataatsimiititaliap suliamik suliarinninnera

Ataatsimiititaliap novembarip 14-ani 2017 ataatsimiinnerani innersuussut akuersissutigineqarpoq.

#### **Innersuussut**

Aningaasaqarnermut ataatsimiititaliap kommunalbestyrelsimut innersuussutigivaa akuereqqullugu,

-kommunip pilersaarusionerfigineqarneranut tapiliussaq nr. 29-ssatut siunnersuut aningaasaqarnermut ataatsimiititaliamit kommunalbestyrelsimiillu akuerineqareerpat sapaatit akunnerini arfineq-pingasuni tamanut tusarniutigineqassasoq



## **Aalajangiineq**

### **Ilanngussat**

1. Kommuniq pilersaarusiordfigineqarnerani tapiliusseq nr. 29-ssatut siunnersuut.
2. Kangerlussuarimi nunaqarfimmi aqutsisut tusarniaaffigineqarnerminnut akissuteqaataat.

**Imm. 11 "Maniitsumi Tikaasami Heliportitoqqami siunertanut ataatsimoorussanut inissiassanik nutaanik atortulersuutinillu sanaartornissaq" pillugu kommunip pilersaarusiortfigineqarnerani tapliussap nr. 34-p akuersissutigineqarnera**

*Journalnr. 16.03.01.01*

Tunuliaqutaq

Illoqarfiup kitaani mittarfiup nutaap pilersinneqarnissaata tungaanut, immikkoortup ilaa ukiorpassuani Maniitsumi illoqarfianut Heliportit atorneqarnikuvoq. illoqarfimmi nunaminertat sanaartorfiusinnaasut nunngungajalermata, Maniitsumi pioreersumi inissianik nutaanik amerlanerusunik pilersitsinissamut heliportitoqqami nunaminertat orniginartut atorluarneqar-sinnaasullu atorluarneqarnissaanut periarfissatsialaapput. Nunaminertaq siusinnerusukku maannamullu nuannaariarnernut illoqarfimmilu innuttaasut kangerluup tungaanut, qaqqanut aamma ataani kangerlummi arfeqartarnerani nasikkiartortarfiattut atorneqartarpoq.

Pilersaarummi nutaami pingaartumik eqqarsaataavoq, nunaminertami orniginartumi tassani sapinngisamik inissiat amerlasuut inissinneqarnissaat, taamaalilluni sumiiffimmik taassuminnga nuannarineqartumik innuttaasut innuttaaqataasullu sapinngisamik sulii atorluaasinnaasasut.

Taamaattumik pisuinnarnut, aneerussivilisartunut, biilinullu manna tikillugu "heliport"-imukartartunut kangerlummut isikkivimmut nasikkiartortunut inissalimmik, pilersaarutikkut nasittarfissamut nutaamut aamma inniminniisoqarnikuvoq.

Inissianik sanaartornerit nutaat illunik arlalinnik quleriilinnik imminnut atasunik, tamarmik nunaminertaq ammaloqiusaasoq pitsaasumik isikkiveqartunik aamma ataatsimoorluni uninngaartarfeqartunik aamma pinnguartarfeqartunik sumiiffik sapinngisamik atussavaat, heliporti ammaloqiusaasoq pioreersoq takutinniarlugu. Heliportitoq (ammaloqiusaq) pioreersoq pilersaarummik annertussutsumigut killilersugaavoq, kisianni sanaartukkat nutaat ammaloqiusami pioreersutut ilusilersorneqassapput, heliportit atuunnikuuneratut attuumassutilerlugit.

Pilersaarutip ilusaa aalajangersagartaalu, Tromsømi illussanik titartaasartut 70\*N 2010-mi Maniitsumut "Takorluukkanut nalunaarusaq/Visionrapport" suliarinikuusaannut naapertuuppoq. Taamaattumik illoqarfimmut tamarmut ersarippallaamik nuisimanagerat ersarippallaarnerallu pissutigalugit, illut ilusissaannut kusanartuunissaanullu piumasaqaatitaqassaaq.

Maleruagassatigut tunngavissat

Kommunip pilersaarusiortfigineqarneranut tapliussaq nuna tamakkerlugu pilersaarummut pioreersumut, kommunillu pilersaarusiortneqarneranut pigineqartumut naapertuuppoq.

Pissutsit atuuttut

Nunaminertat ullumikkut qaqqap qaani ammalortutut, nunaminertap qeqqani mittarfimmik asfaltigaasumik sulii isikkoqarput. Nunaminertaq qaqqamik attorneqarpiannngitsumik, ilaqutariinnut illunik inuinnarnit pigineqartunit kaajallallugu avatangiiseqarpoq. Kujammut kimmut illunik nutaanngitsoqarpoq, avannamullu kangimut ilaqutariinnut illunik ileqqoq malillugu sanaartukkanik nutaanerulaartunik illoqarluni.

Nunaminertap ilaanut aqqusineqarnikkut appakaaffik qaqqap sinaani avannamut kimmut (maanna Tikaasaq) Mittarfik sivingasuukku pioreersukku pisarpoq. Qatsissup qaavani nunaminertani sanaartorfioreersut saniatigut, Ivissuaateralaa sinerlugu "hylde"-mik 20 m missaani nerututigisumik, illoqarfiup ilaata ataani aqqusineq qulaallugu 10 m missaani portunerusumik aamma

inissisimasoqarpoq. Sanaartorfissat taakku tikikkuminaatsuupput, qaqqarlu tikivillugu sanaartortoqassalluni, tassanilu inissialiortoqassappat imaanuinnaq isikkiveqassalluni.

#### Pilersaarutip imaa

Nunaminertat sanaartorfissat nutaat ilisimaasarlugu inissiaatileqatigiiffiit inissiassaannut, inissianut attartortitassanut, inuusuttunut inissianut aammalu siunertanut ataatsimoorussanut sanaartukkanut nutaanut immikkoortitaapput, illoqarfiup nunaminertaatut aammalu inissimaffiata orniginarnerpaatut, sumiiffimmik taassuminnga sapinngisamik innuttaasut innuttaaqatasullu aamma siunissami iluaquteqarsinnaanissaat qulakkeerniarneqarluni.

Nunaminertami nasittarfimmik nutaamik inissiiikkut, illoqarfimmi innuttaasut sumiiffimmik taassuminnga nuannaariartarfittut atuiinnarnissaat qulakkeerneqassaaq. Sumiiffimmi inissianik siunissami peqaraluarpat, sumiiffimmi siusinnerusukkut atuuffianut attuumassuteqanngitsunik, najugaqartunut taakkununga nasiffimmut appakaanniarnissaq akornusersuinaviannigilaq. Ilutigitillugu nunaminertani sanianiittunut illoqarfiup innuttaasui heliportitoqqamut toqqaannartumik majuartarfiit nutaat atorlugit nasiffimmut nutaamut, nunaminertamillu sanianiittumut appakaassinnaanissaat qulakkeerneqassaaq.

Naggataagullu sanaartorfissaq ersarissaq sulilu ilisimanngisanut, soorlu siunertanut ataatsimoorussanut hotellenut, kulturikkut illorsuarmut siunertanulluunniit ataatsimoorussanut assingusunut illoqarfimmi innuttaasunut tamanut iluaqutaasussat nunaminertami inissinneqarsinnaanissaat qulakkeerneqassaaq. (Pilersaarutip imarisaani ersarissaatit ilanngussaq 2-mi takuneqarsinnaapput).

#### Atuilluartuunissakkut kingunerisinnaasai

Illoqarfiup immikkoortuani nutaami nukissiuutit ataavartut soorlu seqernup kissaa aammalu seqinisaatit atornissaannut periarfissaqarpoq. Nunaminertaq aammattaaq eqqagassanik immikkoortiterinermut containerinik inissiiinissamut periarfissiivoq.

#### Aningaasaqarnikkut allaffissornikkullu kingunerisinnaasai

Sanaartorfissagissaaneq aallaqqaammut Qeqqata Kommunianit aningaasalersorneqassaaq, malitsigisaanilli sanaartortunit ataasiakkaanit akilerneqartalissaaq, sanaartorfissat annertussusaat nunaminertallu inissianut atorneqarnerat naapertorlugu aalajangersarneqartunik agguataarneqartunillu. Taamaattumik sanaartorfissagissaanermut kommunip aningaasartuutaa taamaallaat akiliussigallarnertut isigineqassapput. Tassungali ilanngunneqanngillat, illoqarfimmut tamarmut nasiffittut heliportiusimasup taartissaanut, nasiffimmut nutaamut pilersitsinermut aningaasartuutit.

#### Allaffeqarfiup innersuussutaa

Allaffeqarfiup nalilerpaa, inissiaqarfimmik aamma nuannaariartarfimmik immikkut orniginartumik pilersitsinissamut pilersaarut tunngaviliisoq, siunissamilu Maniitsumi innuttaasunit tamanit nuannarineqartussaallunilu iluaqutaassasoq.

Taamaattumik allaffeqarfiup innersuussutigaa, Aningaasaqarnermut ataatsimiititaliap Kommunalbestyrelsillu akuersissutigissagaat,

-kommunip pilersaarusionerqarneranut tapiliussaq nr. 34-ssatut siunnersuut aningaasaqarnermut ataatsimiititaliamit kommunalbestyrelsimiillu akuerineqareerpat sapaatit akunnerini arfineq-pingasuni tamanut tusarniutigineqassasoq

Aningaasaqarnermut ataatsimiititaliap suliamik suliarinninnera

Ataatsimiititaliap novembarip 14-ani 2017 ataatsimiinnerani innersuussut akuersissutigineqarpoq.

**Innersuussut**

Aningaasaqarnermut ataatsimiititaliap kommunalbestyrelsimut innersuussutigivaa akuereqqullugu,

-kommunip pilersaarusionerqarneranut tapiliussaq nr. 34-ssatut siunnersuut aningaasaqarnermut ataatsimiititaliamit kommunalbestyrelsimiillu akuerineqareerpat sapaatit akunnerini arfineq-pingasuni tamanut tusarniutigineqassasoq

**Aalajangiineq**

**Ilanngussat**

1. "Maniitsumi Tikaasami Heliportitoqqami siunertanut ataatsimoorussanut inissiassanik nutaanik atortulersuutinillu sanaartornissaq" pillugu Kommunip pilersaarusionerfigineqarnerani tapiliussaq nr. 34-ssatut siunnersuut
2. Nunap assinga 1, Nunaminertap ilaata killilersorneqarnera
3. Nunap assinga 2, Nunaminertap ilaata siunissami atorineqarnissaa
4. Nunap assinga 3, Siunissami sanaartugassanut periusissaq

**Imm. 12 Ataatsimoorussamik siunertanut immikkoortoq, atuakkanik atorniartarfimmumut, nipilersornermullu ilinniarfimmumut Kommunip pilersaarusiortfigineqarneranut tapiliussaq nr. 49**

*Journalnr. 16.03.01.01*

Tunuliaqutaq

Atuakkanik atorniartarfimmumut nutaamik kiisalu nipilersornermullu ilinniarfimmumut nutaamik pilersitsinissamut, Kommunalbestyrelsi missingersuutitigut aningaasanik immikkoortitsinikuuvoq. Tassunga tapertaliullugu, nalunnguarfiup kujataatungaani qaqqap iluani naluttarfiliornissamut aningaasaateqarfimmumut aningaasaliisoqarnikuuvoq. Naluttarfiup pioreersup atorunnaarsinneqarnissaanik tamanna kinguneqassasoq naatsorsuutigineqarpoq. Tamannalu tunngavigalugu immikkoortoq taanna pilersaarummi matumani ilanngunneqarluni.

Maleruagassatigut tunngavissat

Pilersaarusiortneq aamma nunaminertat atorneqartarnerat pillugit Inatsisartut inatsisaat nr. 17, 17. novembari 2010-meersoq aamma Pilersaarusiortneq aamma nunaminertat atorneqartarnerat pillugit Inatsisartut inatsisaata allanngortinneqarneranik Inatsisartut inatsisaat nr. 34, 9. december 2015 (Nuna tamakkerlugu pilersaarusiortnermut nalunaarusiaq, nunaminertanik inniminniisarneq, atuisinnaanermut killigitamik sivitsuisinnaanermut periarfissaq, utaqqisunik allattorsimaffiup saqqummiunneqarnissaa, pilersaarusiortnermut- nunaminertamillu atuisinnaanermut atatillugu naammagittaalliortarfiup allallu atorunnaarsinneqarnissaa naapertorlugit kommunip pilersaarusiortfigineqarneranut tapiliussaq suliarinearpoq.

Pissutsit atuuttut

2017-imut 2018-imullu missingersuutitigut, kulturikkut illorsuarmut timersortarfeeqqamullu atassuteqartussanik, atuakkanik atorniartarfimmumut nutaamik kiisalu nipilersornermik ilinniarfimmumut nutaamik pilersitsinissamut aningaasanik immikkoortitsisoqarpoq. Nunaminertat pioreersut nutaallu sammisaqartitsinermut tamanut eqaatsumik atorneqarnissaat, nunaminertallu innarluutilinnit tikinneqarsinnaanissaata qulakkeerneqarnissaat anguniagaavoq.

Atuakkanik atorniartarfimmumut nipilersornermullu ilinniarfimmumut pilersitsinissamut 1000 m<sup>2</sup>-it missaanik annertutigisoq pisariaqartinneqassasoq naatsorsuutigineqarpoq, pilersitsinerillu kulturikkut illorsuarmut timersortarfeeqqamullu ataqaqtiissallutik. Sanaartorneq nutaaq sanaartornikkut sanaartornermik eqaatsumik atuinermut tapertaassaaq. Maannakkut naluttarfiup inissisimaffiani, meeqqerivimmumut fritidshjemimullu attuumassuteqartumik, illumik marlunnik quleriilimmik 360 m<sup>2</sup>-isut annertutigisumik sanaartornissamut periarfissiissaaq.

Aqquserngit appakaaffissat pioreersut atorneqassasut allassimavoq, sanaartornissamullu periarfissanut attuumasunik biilinit inissiivissanik nutaanik pilersitsisoqassalluni, maannakkullu timersortarfeeqqami Nalunnguarfiup Atuarfiatalu ingerlanneqarnerinut atatillugu biilinit inissiivinnik pilersitsisoqassalluni.

Kommunip pilersaarusiortfigineqarneranut tapiliussami immikkoortoq 800-C4 tamarmi pineqarpoq, immikkualuttut 800-C4.1 - 4 ilanngullugit

Oqaatigineqassaaq, kommunip pilersaarusiortfigineqarneranut tapiliussamut siunnersuut, siusinnerusukkut sumiiffimmi pilersaarummit 8Cb-mit ingerlatitseqqinerummat, kulturikkut

illorsuarmut atatillugu atuakkanik atorniartarfimmut annikitsumik alliliinermik ilassuteqartoqarluni. Pilersaarutip ilaani sanaartukkanut assigiinngitsunut, soorlu skatertarfik, naluttarfik il. il., aalajanginernut annikitsualunnik pilersaarusiornikkut ataatsimoortitsineruvoq.

Kommunip pilersaarusiordfigineqarneranut tapiliussaq 2017-imi aggustip 29-anit 2017-imi oktobarip 24-ata tungaanut tamanut tusarniutigineqarpoq. Tusarniutigineqarnerani oqaaseqaatit akerliliissutillu tulliuuttut tiguneqarput:

1. Aningaasaqarnermut Naalakkersuisoqarfik, Nuna tamakkerlugu pilersaarusiortarfik. Kommunip pilersaarusiordfigineqarneranut tapiliussatigut Namminersorlutik Oqartussat soqutigisaannut akimmiffeqanngimmat, kommunip pilersaarusiordfigineqarneranut tapiliussap inaarutaasumik akuersissutigineqarnissaanut akornutissaqanngitsoq nassuiaatigaat.
2. Kommuninut, Nunaqarfinnut, Isorliunerusunut, Attaveqaqatigiinnermut Ineqarnermullu Naalakkersuisoqarfik oqaaseqaatissaqanngilaq.
3. Nunatta Katersugaasivia oqaaseqaatissaqanngilaq.
4. Sanaartortitsinissami teknikkimut tunngasunik, pilersaarummulli eqquinngitsunik Nukissiorfiit arlalinnik oqaaseqaateqarpoq, innersuussutigalugulu biilinet inissiivissani biilinet innaallagissamik ingerlatilinnut immiisarfissanut inissanik immikkoortitsisoqarnissaa innersuussutigalugu.
  - a. Allaffeqarfiup oqaaseqaatai: Sanaartugassap pilersaarusiordfigineqarnerani Nukissiorfiit oqaaseqaataasa eqqarsaatigineqarnissaat siunertaralugu, Nukissiorfiit oqaaseqaataat sanaartornermut immikkoortortaqqarfimmut ingerlateqqinneqassapput.
5. Nalunnguarfiup Atuarfiata, Skole 2, oqaatigaa:
  - a. sanaartugassaq minihaalimit portunerussanngippat sanaartugassaq akuersaarnartoq.
  - b. Atuarnerup, anitsiarnerillu nalaanni biilinet angallattoqangaatsialernissaa innersuussutigalugu, biilinet inissiivissamut aqqusinnaq, atuarfiup kangia-tungaani qaqqaaqqap tunuatiqoortinneqartariaqartoq. Immikkoortumi qimmiliviit nuutsinneqarnissaat aamma kissaatigineqarpoq.
  - c. Ilinniartitsisunut biilinet inissiivissatut siunnersuutigineqartoq naammannngitsoq, atuartummi sikkilertarfimmik atuinerminni taanna aqqutigiuartarmassuk.

Allaffeqarfiup oqaaseqaatai  
Sanaartugassaq minihalitit portutigissasoq naatsorsuutigineqanngilaq, qularnannngitsumik kulturikkut illorsuurtulli portutigissaaq, aqqusinerlu eqqarsaatigalugu biilinet angallanneq allagartalersuinikkut, aqqusinerlu kigaallisaatilersuinikkut assigisaannilluunniit iliuuseqarnikkut, atuartut pinnguarterfiliarnerminni atuarfiup kangia-tungaani aqqusinerlu atuisinnaassapput. Biilinet inissiivimmut tunngatillugu nalinginnaasumik atuarnep nala unammillernarnerussaaq.  
Ilinniartitsisunut biilinet inissiivissatut kommunip pilersaarusiordfigineqarneranut tapiliussami innersuunneqartoq peerneqassaaq. Immikkoortortami tassani siunissami nutaamik pilersaarutitigut tunngavissaliortoqalerpat, kingusinnerusukkut aqqusineq qaqqaaqqap kangia-tungaatiqoortinneqarsinnaassaaq.

#### Atuilluuntuunissakkut kingunerisinnaasai

Naluttarfimmut nutaamut kiisalu atuakkanik atorniartarfimmik nipilersornermullu ilinniartarfimmik pilersitsinerlut ataatillugu, kissamik sinneruttumik atuilluarsinnaanerup qulakkeerneqarnissaanut, Sisimiuni ikuallaavimmit kissamik attaveqaatinik ataatsimoortitsinissaq qulakkeerneqassaaq. Kulturikkut illorsuup, Atuakkanik atorniartarfiup, Nipilersornermullu Ilinniartarfiup akornanni

sunnivigeqatigiinnerat eqqarsaatigissagaanni, taakku orninnartillugit biilnik angallannissaq annikillisinneqassaaq.

#### Aningaasaqarnikkut allaffissornikkullu kingunerisinnaasai

Pilersaarusiormermi tapiliussaq Qeqqata Kommunianut aningaasaqarnikkut allaffissornikkullu toqqaannartumik kinguneqartitsissanngilaq. Sanaartukkani ataasiakkaanik aningaasaqarneq, sanaartormermut sulianik immikkut suliaqarnermi suliarineqartassapput.

Immikkoortortami tassani aqqusineqareermat, innaallagissamut aqquteqareermat, kuuffissuaqareermat, kiammillu pilersuinissamut aqquteqareermat sanaartorfissagissarneqareerpoq. Sanaartorfissani ataasiakkaani aqqusinermit isaariassat, stikledninngissallu nammineq aningaasartuutigineqassapput, taamaattumillu sanaartorfissanut atatillugu sanaartorfissagissaasitsinissami akiliutitaqartussaanatik.

#### Allaffeqarfiup naliliinera

Allaffeqarfiup nalilerpaa, immikkoortup ataatsimoorussamik siunertanut atorneqarnissaanut eqqarsaatersuummik pilersaarut tapersiisoq, taamatullu kulturikkut illorsuup timersortarfeeqqallu, atuakkanik atorniartarfimmik nipilersormermullu ilinniarfimmik ilasinikkut, ineriartortinnerinut atorluarnissaannullu periarfissiinissamik qulakkeerisoq.

#### Allaffeqarfiup innersuussutaa

Allaffeqarfiup Aningaasaqarnermut ataatsimiititaliamut innersuussutigaa akuereqqullugu,

-tapiliussami ilinniartitsisunut biilnut inissiivissaq peerneqarmat, iluarsissutissatut allaffeqarfiup siunnersuutigisai ilanngullugit, immikkoortumut 800-C4-mut kommunip pilersaarusiordfigineqarneranut tapiliussaq nr. 49 aningaasaqarnermut ataatsimiititaliamit kommunalbestyrelsimiillu inaarutaasumik akuersissutigineqassasoq

#### Aningaasaqarnermut ataatsimiititaliap suliamik suliarinninnera

Ataatsimiititaliap novembarip 14-ani 2017 ataatsimiinnerani innersuussut akuersissutigineqarpoq.

#### **Innersuussut**

Aningaasaqarnermut ataatsimiititaliap kommunalbestyrelsimut innersuussutigivaa akuereqqullugu,

-tapiliussami ilinniartitsisunut biilnut inissiivissaq peerneqarmat, iluarsissutissatut allaffeqarfiup siunnersuutigisai ilanngullugit, immikkoortumut 800-C4-mut kommunip pilersaarusiordfigineqarneranut tapiliussaq nr. 49 aningaasaqarnermut ataatsimiititaliamit kommunalbestyrelsimiillu inaarutaasumik akuersissutigineqassasoq

#### **Aalajangiineq**

#### **Ilanngussat**

1. Kommunip pilersaarusiordfigineqarneranut tapiliussaq nr. 49
2. Akerliliissutit oqaaseqaatillu.

**Imm. 13 Aningaasaqarnermut ataatsimiititaliap kommunalbestyrelsillu 2018-imi ataatsimiiffissaannut siunnersuutit**

*Journalnr. 01.01.01*

Aningaasaqarnermut ataatsimiititaliap kommunalbestyrelsillu 2018-imi ataatsimiiffissaannut siunnersuutit.

Allamik nalunaartoqarsimatinnagu ataatsimiinnerit tamarmik nal 8:30 aallartittassapput oqarasuaatikku/videokonferenciluunniit atorlugu ingerlanneqartassallutik.

<b>Aningaasaqarnermut ataatsimiititaliaq</b>	<b>Kommunalbestyrelsi</b>
13. februar	22. februar - Sisimiut
13. marts	
17. april	26. april – 2018-imut naatsorsuutit akuerineri.
15. maj	24. maj
12. juni	
14. august	23. august - Maniitsoq
18. september – 2019-imut missingersuutit siullermeeneri	27. september - 2019-imut missingersuutit siullermeeneri
16. oktober – 2019-imut missingersuutit aappassanneeneri	25. oktober - 2019-imut missingersuutit aappassanneeneri
13. november	22. november
11. december	
	<b>Pisussat allat</b>
	20.-22. august – 2019-imut missingersuutit pillugit isumasioqatigiinneq. Maniitsoq

Allaffeqarfiup innersuussutaa

Ataatsimiiffisat siuliani taaneqartut, aningaasaqarnermut ataatsimiititaliamit kommunalbestyrelsimillu akuerineqassasut qullersaqarfiup innersuussutigaa.

Aningaasaqarnermut ataatsimiititaliap suliamik suliarinninnera

Ataatsimiititaliap novembarip 14-ani 2017 ataatsimiinnerani innersuussut akuersissutigineqarpoq.

**Innersuussut**

Aningaasaqarnermut ataatsimiititaliap kommunalbestyrelsimut innersuussut akuerissagaa.

**Aalajangiineq**

**Ilanngussaq**

1. 2018-imut ullorsiutit



**Imm. 14 2017-mi pitsaassuseq pillugu atuarfiit nalunaarusiaat**

*Journalnr. 51.00*

Tunuliaqutaq

Atuarfik pillugu Inatsisartut inatsississaattut siunnersuut nr. 15, 3. december 2012-imeersaq naapertorlugu piumasaqaatinngorpoq, pitsaassuseq pillugu ukiumoortumik nalunaarusiamik atuarfinni pisortat kommunalbestyrelsimut nassitsisalissasut. Pitsaassumik nalunaarusiorfissamik Ilinniartitaanermut Naalakkersuisoqarfiup suli saqqummiussinikuunngimmat, atuarfinni pisortanit immersorneqartussamik Qeqqata Kommunua nammineerluni immersuiffissaliornikuuvoq.

Maleruagassatigut tunngavissat

Atuarfik pillugu Inatsisartut inatsississaattut siunnersuut nr. 15, 3. December 2012-imeersaq § 49. Atuarfiup pisortaa pitsaassuseq pillugu nalunaarusiortassaaq ukiumi atuarfiusumi pineqartumi 1. oktober sioqqullugu kommunalbestyrelsimut nassiunneqartussamik.

*Imm. 2.* Pitsaassuseq pillugu nalunaarusiap imarisassavai ukiumi atuarfiusumi kingullermi nukarlerni akullernilu misitsinnerni angusat, angajullerni inaarutaasumik misilitsinnerni angusat, iliuusissanik pilersaarusernerit, agguaqatigiissillugu klassini atuartut amerlassusiat, piffissaq atuartitsineritut atorpeqarpoq, napparsimanerit pillugit naatsorsuinerit, piffissaq vikarinit atorpeqartartoq, atuartunik atuarunnaartussanik ilinniagaqalernissaq inuussutissarsiummillu toqqaanissaq pillugit siunnersuinerup annertussusia aamma siuliani taaneqartup pitsaassuseq pillugu nalunaarusiornerup malitseqartinnera.

Pissutsit atuuttut

Oktobarip aallaqqaataa tikitsinnagu atuarfiit pitsaassuseq pillugu nalunaarusiamik tunniussisussaanikuupput. Pitsaassutsit pillugit nalunaarusiat arfineq pingasut kommunimit tiguneqarput.

Kommuni ukiuni kingullerni kommunip atuarfiinut tamanut ataatsimoortumik pitsaassutsimik nalunaarusiorpoq, tamanna atorneqarsinnaavoq atuarfeqarfimmut aqutsinikkut sakkussatut atorneqarsinnaassalluni pingaaruteqartutigut allaffissornikkut politikikkulu ingerlatsisut ataatsimut isiginnissinnaanerannik pilersitsissammat. Pitsaassutsimik nalunaarusiaq taanna atuarfiit namminneq pitsaassutsimik nalunaarusiaat ilanngullugit kommunip nittartagaatigut saqqummiunneqarput.

Pitsaassutsimik nalunaarusiat aallaaviussapput kommunalbestyrelsip atuarfinnik nakkutiginninneranik. Taamaattumik pitsaassutsinik nalunaarusiat kommunalbestyrelsip ukiumoortumik nakkutilliilluni pulaarnerani atorneqassapput aammalu atuarfiip siulersuisuisa UKFU-lu akunnerminni oqallisiginninnerannik (attaveqatigiinnermut- nakkutilliinissamullu pilersaarut naapertorlugu).

Allaffeqarfiup naliliinera

Atuarfeqarfiup inerisarnera pillugu oqallisiginninnermi ataatsimut pitsaassutsimik nalunaarusiaq atorneqartariaqarpoq.

Allaffeqarfiup innersuussutaa

Ilinniartitaanermut, Peqqinnermut, Kulturimut Sunngiffimmullu ataatsimiititaliamut innersuussutigineqarpoq kommunalbestyrelsip akuersissutigissagaa,

- Pitsaassuseq pillugu atuarfiit nalunaarusiaat tusaatissatut tiguneqassasut
- Pitsaassutsimik ataatsimut nalunaarusiap inerneru oqallisigissagaa
- Immikkoortoq kommunalbestyrelsimut ingerlateqqinneqassasoq

Ilinniartitaanermut, Peqqinnermut, Kulturimut Sunngiffimmullu ataatsimiititaliap suliamik suliarinninnera

Ataatsimiititaliap novembarip pingajuani 2017 ataatsimiinnernimi aalajangerpaa,

**Malene Ingemann:**

*Imm. 9-mut siunnersuutai.*

*I1A: Ilinniartitsisunik faginut ilinniarsimasunik klassit ilinniartinneqatut amerlassusaat.*

*I1B: Nukarlerni angajullernilu ilinniartitsisunik fagimut ilinniarsimasut sapinngisaa.*

*Ukiumut pilersaarutinut piumasaqaataasunik ukiumut pilersaarutit qassit naamassinnittarpat:*

*Assersuutigalugu*

*Sapaatit akunnerini 36-imi pilersaarutaasumik atuartinneqarnissaq*

*Klassit qaffakkartornerisa akornanni akimortumik suleqatigiinnissamik eqqarsaatit*

*Suliatigut inerikkiartornissamut nalilersuinissamut atuarfinni aqutsisut atorsinnaasaat*

*Angajoqqaanit atuartunillu sakkussat atorreqarsinnaasut*

Suliaq tusaatissatut tiguneqarpoq. Suliaq kommunalbestyrelsimut ingerlateqqinneqassaaq.

**Innersuussut**

Ilinniartitaanermut, Peqqinnermut, Kulturimut Sunngiffimmullu ataatsimiititaliap kommunalbestyrelsimut innersuussutigaaakuereqqullugu,

- Pitsaassuseq pillugu atuarfiit nalunaarusiaat tusaatissatut tiguneqassasut
- Pitsaassutsimik ataatsimut nalunaarusiap inerneru oqallisigissagaa

**Aalajangiineq**

**Ilanngussat**

1. Qeqqata Kommuniani atuarfeqarfinnut ataatsimut pitsaassutsimik nalunaarusiaq
2. Minngortuunnguup Atuarfianit pitsaassuseq pillugu nalunaarusiaq
3. Qinnguata Atuarfianit pitsaassuseq pillugu nalunaarusiaq
4. Kangaamiut Atuarfianit pitsaassuseq pillugu nalunaarusiaq
5. Itillip Atuarfianit pitsaassuseq pillugu nalunaarusiaq
6. Sarfannguit atuarfianit pitsaassuseq pillugu nalunaarusiaq
7. Nalunnguarfiup atuarfianit pitsaassuseq pillugu nalunaarusiaq
8. Atuarfik Kilaaseqqamiit pitsaassuseq pillugu nalunaarusiaq
9. Atammip atuarfianut pitsaassutsimut nalunaarusiaq

**Imm. 15 Oqaluuserisassatut siunnersuut - Aningaasanik aqutsisinnaanermik pikkorissarneq**

*Journalnr. 03.20*

Tunuliaqutaq

Borgmesteri Malik Berthelsen oktobarip 24-ani 2017 email-ikkut siunnersuummik nassiussivoq siunnersuutigalugu aningaasanik aqutsisinnaanermik pikkorissarnissaq.

Assortorneqarsinnaanngitsumik aningaasaq inuunitsinni pingaarutilerujussuarmik inissisimavoq, allaat inuunitsinni pinngitsoorsinnaanatigu.

Taannaavormi namminerisatsinnik angerlarsimaffeqarnissatsinnut, imminut pilersornissatsinnut inuuniarnitsinnilu aalajangiisuusoq. Taamaattumik aningaasanik aqutsisinnaaneq pingaarnersuisinnaanerlu inuunitsinni pingaarutilerujussuupput.

Inuttut ilaqutariittullu inuunerissaarnerusinnaanerigaluarput aningaasanik aqutsisinnaannginnermik pingaarnersiusinnaannginnermillu ajoralauartumik ilaatigut innarlertarparput.

Soorlu inigisamut akiliinngitsoortarnerit, meeqqat pisariaqartitaannut akissaaruttarnerit, aningaasarseqqinnissap tungaanut naammattunik nerisassaqaanngittarnerit, nalilinnik soorlu illumik pigisaqalersinnaanerigaluit il.il.

Pissutsillu nuanninngitsut taamatut ittut ikilisarniarlugit innuttaasullu inuunerissaarnerulernissaannut aqutissiueqataajumalluta kommunemiit ikiorsiissuteqarnissarput pisariaqartutut isumaqarfigaara.

Taamaattumik siunnersuutigaara kommune immaqqa Majoriaq Aningaaserivillu suleqatigalugit aningaasanik aqutsisinnaanermik erniortitsisinnaanermillu pikkorissarnernik innuttaasunut piumasunut neqerooruteqassasoq.

Pingaarutilittut oqaatigissavara pikkorissarnissamik aqqissuussinissatut takorluukkakka, taamaallaat inuuniarnikkut ajornartorsiutilinnut sammitinneqaratik ilaqutariit ataatsimut isigalugit tulluarsarneqassammata, soorlu ulluinnarni inuunitsinni pingaaruteqaanngitsunut aningaasajaatigisartakkagut allanut ileqqaarnernulluunniit atorutsigit pingaarnernunnginnerisut eqqarsaatissiissutigalugit. Assersuutigiinnarlugu pisiniarfiliarnerit tamaasa soq puussiarsisassaagut 3,50kr.-limmik, uffalu puumik (taske) 10kr.-ilimmik ukioq naallugu atorneqarsinnaasumik pisisinnaalluta?

**Innersuussut**

Innersuussutigineqarpoq siunnersuut oqallisigeriarlugu Ilinniartitaanermut ataatsimiititaliamut ingerlateqqinneqassasoq suliarisassanngorlugu.

**Aalajangiineq**

**Ilanngussaq**

1. Malik Berthelsen-ip email-ia oktobarip 24-aniit 2017



**Imm. 16 Nilammik imermillu avammut nioqquteqarnermi periusissiaq pillugu tusarniaaneq**

*Journalnr. 73.10.10*

Tunuliaqutaq

Nilammik imermillu avammut nioqquteqarnermi periusissiaq pillugu siunnersuummik Naalackersuisuniit tusarniaanermik (2017 – 2021) Qeqqata Kommunian ulloq 12.10 tigusaqarpoq. Akissuteqarnissamut piffissarititaasoq 2017-imi novembarip pingajuanut killeqarpoq. Nilammik imermillu avammut nioqquteqarnermi periusissiaq 2004-meersoq nutartertariaqartoq Naalackersuisut nalilersimavaat. Naalackersuisut isumaqarput, Nilammik imermillu avammut nioqquteqarnermi periusissiaq 2004-meersoq misilittakkanik naleqarluartunik nassataqartitsisi-masoq, tassunga ilanngullugu eqqaaneqarsinnaallutik kalaallit sikutigut imikkullu pisuussutaasa ilaatigut sumiissusersineri. Aammattaaq nunat tamakkerlugit nioqquteqarnermi unammilleqatigiin-nikkullu pitsaanerusumik pissarsiffiusinnaassaaq, tassungalu ilaalluni Kalaallit Nunaata periarfissai sumiinersut sumiinnginersullu sukumiinerusumik ilisimasaqarfigineqalernissaa. Tamanna tunngavigalugu Kalaallit Nunaannut niuernermit immikkoortitseriaatsit sorliit tulluernerussanersut pillugit ersarinnerulersitsisinnaavoq. Maannakkut Naalackersuisut Nilammik imermillu avammut nioqquteqarnermi periusissiaq pillugu tusarniaapput (2017 – 2021).

Maleruagassatigut tunngavissat

Inatsisartut inatsisaat nr. 7 ulloq 31. maj 2001-imeersoq sermip erngullu avammut nioqqutissatut atorneqarnissaannut tunngasoq (sermip erngullu avammut nioqqutiginissaannut inatsit), allannqortoq Inatsisartut inatsisaannut nr 3 majip 15-ani, 2014, kingornalu allannqortinneqarluni Inatsisartut inatsisaat nr 35 28 novembar 2016.

Pissutsit atuuttut

Periusissiaq pingaarnertut malitassianut pingasunut agguataagaavoq. Siullertut; erngup aattorfigi sinnaasaattut tulluarsorisat attuumassutillillu sumiissusersiffigineqassapput. Sumiiffiillu taakkua toqqaariaatsit assigiinngitsut atorlugit toqqartorneqassallutik, tassani kalaallit nunaanni unammillernartut nunap sananeqaataanut attaveqatigiinnermullu tunngassutillit eqqumaffigineqassallutik, tamatumalu saniatigut erngup imigassap pitsaassusaata qaffasissuunissaa. Aappaattut; akileraarutit akileraartarnerullu qaffasissusissaata nalimmassarnissaa, taamaalilluni erngup avammut tunisassiarineqarnissaanut ineriartornissamut government take-p katinnera akornutaannginniassamat. Tamanna akileraarutitigut akileraartarnikkullu atugassarititat pillugit benchmarkings analyse tunuliaqutaralugit suliarineqarpoq, nunat allat assersuunneqarsinnaasut atorlugit kiisalu takusassiarineqarsinnaasut naapertorlugit pisussanik naatsorsuinerit. Pingajuattut; nilammut imermillu tunngassutilinnut inatsisinut sinaakkutaasussanut pitsannqorsaanissaq ukkatarineqarpoq. Massakkut inatsisinut sinaakkutaasoq naapertorlugu kissaatigineqarpoq maannakkut qinnuteqariaatsimut tapertatut neqerooruteqartitsinermik ilanngussisoqassasoq, siulliuniunnermut tunngavik malillugu.

PriceWaterHouseCoopers benchmark analyse atorlugu nunarsuarmit tamani nilammik imermillu avammut tunisassiornermi akileraartarnermut tunngasunik suliaqarsimavoq, taassumalu takutippaa Kalaallit Nunaanni Ingerlatseqatigiiffiit akileraarutaat- akileraarutinillu iluanaarutit nunanut allanut sanilliullugit qaffasittut. iluanaarutisianik agguassanut akileraarusersuineq katillugu, ima oqaatigalugu Ingerlatseqatigiiffiit akileraarutaat iluanaarutinillu akileraarutit, qaffasissusaat Kalaallit Nunaanni 40-44 %-imiippoq. Taamaalilluni Kalaallit Nunaat Alaska-mut sanilliussinermit

qaffasinnerpaanngorluni. Ingerlatseqatigiiffiit akileraarutaat iluanaarutinillu akileraarutit eqqaassanngikkaanni, Kalaallit Nunaata aamma erngup avammut tunisassiarineranut atatillugu Iluanaarutinut akitsuusersuinissaq (Royalty) piumasarivaa.

Kalaallit Nunaat nilammik imermillu avammut tunisassiornissaminut periarfissaqarluarpoq, kisianni nunat tamakkerlugit imermik tuniniaanermi unammilleqatigiinneq sakkortuvoq. Maannakkut niueruteqarnissamut misissueqqaarnissamut akuersissutit arfinillit aamma atuinissamut akuersissutit tallimat pigineqarput. Ingerlatseqatigiiffiit tunisassiorneq assigiinngitsunik annertussusilik, avammut tunisassiornermi annertunerusumik iluatsitsivallaarsimangitsoq naammassisimavaat.

Nunat tamakkerlugit niuffaffimmut unammillerfioqisumut akuliunniarneq ajornartorujussuuvoq.

Erngup puiaasamiittup nunat tamakkerlugit tunisassiarineqarnera suli qaffakkiartortuuvoq, pitsaassuserlu apeqqutaalluinnarluni. Aammalu niuerfimmi ingerlatsisut nutaat avammut tunisassiornermi niuffaffimmi assorsuaq iluatsitsinaveeqqapput, tassami niuerfimmi ingerlatsisut annerit annertoorujussuarmik tunisaqarsinnaagamik akinut appasissut atorlugit.

Naalackersuisut inassuteqaatigaat, nilammik imermillu avammut tunisassiornermut akileraarnikkut maleruagassanik ajornaannerusunik unammillernissamullu tulluarnerusunik atuutilersitsisoqartariaqartoq, aammalu kaaviiartitanit akileraarutinut maleruagassamik atuutilersitsisoqartariaqartoq, tassani akitsuut minnerpaamik literimut ataatsimut ataasiakkaarinnikkut akitsuusiinermut aalajangerneqassalluni, takuuk periuseq a, Iluanaarutinut akitsuutit (Royalty) 6 % aamma ataasiakkaarlugit akitsuut minnerpaaq liiterimut ataatsimut 6 øre aammalu akileraarutitaqanngitsoq, taannalu allaffissornikkut suliarinissaa ajornaatsuulluni aqukkuminartuullunilu nuussinermi akigititassanut ajornartorsiuteqarnikkut ajornanginnerusarsimammat. Nuussinermi akigititassat (Transfer pricing) periusaavoq ingerlatseqatigiiffiit, aktiaatillit imaluunniit inuunnaat akornanni nioqqutissanut, sullissinermut pisinnaatitaaffinnullu akinik aalajangiinermut tunngassutalik, tassani toqqaannartumik ilannguttussaanninnerup kingorna Aningaasarsiat akileraaruteqaataasussat naatsorsorneqassallutik (niuernermi atugassarititaasut malillugit niuerneq ingerlanneqarsimassasoq). Periuseq aamma kaaviiartitanit akileraarutinut attuumassuteqartinneqarpoq aki aqussinnaaniarlugu.

Suliamut Nilammik imermillu avammut nioqquteqarnermi periusissiaq pillugu 2017 – 2021 siunnersuummik eqikkaaneq ilanngunneqarpoq.

KANUKOKA Qeqqata Kommunianut 2017-imi novembarip arfernernani paasissutissiivoq, KANUKOKA tusarniaanermut oqaaseqaatissaqanngitsoq.

#### Aningaasaqarnikkut allaffissornikkullu kingunerisinnaasai

Qeqqata Kommuniani aningaasaqarnikkut allaffissornikkullu kinguneqarnissaa naatsorsuutigineqanngilaq.

#### Allaffeqarfiup naliliinera

Allaffeqarfiup nalilerpaa, Nilammik imermillu avammut nioqquteqarnermi periusissiaq pillugu 2017 – 2021 tusarniaaneq politikkikkut isummerfigisariaqartunik imaqartoq, tassani aamma akileraarutit ilusissaasa saqqummiunneqarsimasunit akileraartarnermut politikkikkut apeqqutit pineqartut ilaallutik.

Allaffeqarfiup miserratinginngilaa erngup puujaasamiittup nunat tamakkerlugit niuerutiginiarneranut unammillerneq sakkortuujusoq, aammalu Kalaallit Nunaat niuertarfinnut ungasissorujussusoq.

Akileraatutit annertussusaat nunanut allanut sanilliullugu qaffasippoq, taamaammat imermik puujaasamiittumik tunisassiornissamat aningaasaleerusussuseqarneq orniginarpallaanngilaq, imminut akilersinnaassusaa nalorninarmat.

Taamaattumik allaffeqarfik isumaqarpoq, Nilammik imermillu avammut nioqquteqarnermi periusissiaq pillugu siunnersuummut tusarniaanermi inassutigineqartut, kalaallit nilammik imermillu puujaasamiittumut tunisassiortut unamminartorsiornerinut oqilisaataassasoq.

#### Inuussutissarsiornermut Takornariaqarnermullu Ataatsimiititaliap suliarinera

Inuussutissarsiornermut Takornariaqarnermullu Ataatsimiititaliap siulittaasuata ulloq 7. november 2017 tusarniaassut suliarivaa siulittaasutut aalajangiiffigalugu, ataatsimiititaliap siulittaasua suliamut oqaaseqaateqanngilaq.

#### Allaffeqarfiup innersuussutaa

Innersuussutigineqarpoq, Aningaasaqarnermut ataatsimiititaliap siulittaasuata Nilammik imermillu avammut nioqquteqarnermi periusissiaq pillugu siunnersuummut tusarniaaneq isummerfigissagaa, tassunga siunissami nilammik imermillu avammut tunisassiulernissamat akileraariaasissamat inassuteqarneq ilanngullugu, tusarniaanermullu akissuteqarnissaq aalajangiivigalugu.

#### Siulittaasup aalajangiinera

Borgmesteri Aningaasaqarnermut Ataatsimiititaliaq sinnerlugu novembarip qulingani 2017 aalajangiivoq innersuussut kalaallit imermik puujaasamiittumik avammut tunisassiortut annikinnerusumik akileraartarsinnaanissaannut.

Aningaasaqarnermut Ataatsimiititaliaq ataatsimiinnerup tulliani aalajangiineq pillugu ilisimatinneqassaaq.

#### Allaffeqarfiup innersuussutaa

Suliaq Aningaasaqarnermut ataatsimiititaliamut paasissutissiissutitut saqqummiunneqarpoq.

#### Aningaasaqarnermut ataatsimiititaliap suliamik suliarinninnera

Ataatsimiititaliap novembarip 14-ani 2017 ataatsimiinnerani innersuussut tusaatissatut tiguneqarpoq.

#### **Innersuussut**

Aningaasaqarnermut ataatsimiititaliap kommunalbestyrelsimut innersuussutigivaa akuereqqullugu,

-paasissutissiissut tusaatissatut tiguneqassasoq

#### **Aalajangiineq**

#### **Ilanngussat**

1. Nilammik imermillu avammut nioqquteqarnermi periusissiaq pillugu tusarniaanermut allagaqaat (2017 – 2021).
2. KANUKOKA Tusarniaanermut akissuteqaataa – Nilammik imermullu periusissiaq 2017 – 2021.
3. Nilammik imermullu periusissiassatut siunnersuut (2017 – 2021).

**Imm. 17      Tamalaat**